


21

34



DOMINICI GEORGII
DE
MONOGRAMMATE
CHRISTI DOMINI
DISSERTATIO

Qua mos vetustissimus sacrosancti CHRISTI nominis
per litteras compendiaras exarandi, & monu-
menta veterum christianorum, ex cœme-
teriis Urbis sacræ effossa, a calumniis
Jacobi Bafnagii vindicantur.



R O M Æ
Ex Typographia Bernabò, MDCCXXVIII.

PRÆSIDUM PERMISSU.

Eminentissimo ac Reverendissimo
 DOMINO
 ANTONIO XAVERIO
 GENTILI

TIT. S. STEPHANI IN COELIO MONTE
 PRESBYTERO CARDINALI

DOMINICUS GEORGIUS F.



UUM hanc meam de Monogrammate Christi Domini Dissertationem in lucem emittere tandem statuerim, nihil magis optavi, quam ut ea in tuo nomine vulgaretur & appareret. Intelligebam enim in primis, multis officio-

rum vinculis, ac præsertim recentis beneficii memoria me Tibi obstrictum esse, qui ad mea studia fovenda, quæ jacere ac labefactari quodammodo videbantur, præsidia mihi comparari, & præmia proponi summa CLEMENTIS XII. PONT. MAX. liberalitate curasti; quod me Tibi debere, & ultro profiteor, & lubens agnosco. Quod si hæc mihi tam gravis causa non subesset, permultæ aliæ me in hanc mentem impulissent. Et vero quem non impellerent, non tam tuæ dignitatis amplitudo, quam singularis erga Sedem Apostolicam religio, vitæ innocentia, modestia cum virtute conjuncta, morum suavitas, ac denique humanitas illa tua, qua me semper complexus es, & complecteris eos, qui bonarum artium, ac rerum sacrarum studia sequuntur? Bene mereri de litteris, ut probe nosti, egregium semper & præclarum visum fuit; uberrimi enim inde fructus percipiuntur; præterea hac via, etiamsi utilitas nulla consequere-


queretur, gloriæ, posteritati, ac famæ honestissime consulitur. Hæc autem bene merendi ratio opinione sapientum duplex est; altera eorum, qui non mediocri ingenio præditi, scribendo dant operam; altera eorum, qui splendore generis clari, & divitiis affluentes, summoque loco nati, & constituti, cohortatione & præmiis alios ad scribendum alliciunt. Hi sane præstantes viri hac ratione litteris opem tulisse existimantur, deque iis mereri optime, & immortale quodammodo nomen adipisci: quamobrem a studiosis omnibus gratiæ eis habendæ sunt. Tu vero, Cardinalis amplissime, quum ingenio excellas, & principe loco sis, ac propter rerum maximarum occupationes, monumentum aliquod ingenii tui litteris mandare non possis, alterum præstas, nempe ut iis, quos industria & ingenio vides valere, nulla re desis. Itaque tua in litteras ac litteratos homines merita ejusmodi sunt, ut multi hac de causa se

Tibi

Tibi plurimum debere sentiant. Ego vero, licet nullius ingenii sim, tamen cum in hac causa, ut præmonui, me potissimum esse, intelligam, hoc tenui munusculo, quando per facultates, majore atque uberiore non licet, gratum in Te meum animum quoquo modo possem præbere concupivi: idque eo certiori fiducia feci, quod in hoc argumento quædam a me sic tractata sunt, ut laborem meum Tibi injucundum non fore confidam, Etenim dedi operam, quoad potui, ut convellerem quæcumque efferatus vir Jacobus Basnagius in sacrosanctum Christi Monogramma, in veneranda sacræ Urbis monumenta impie evomuit: ac eo præterea spectavit consilium institutumque meum, ut calumnias retunderem, & incautos, qui Basnagium legerent, hoc veluti antidoto præmunirem. Reliquum nunc mihi est, Cardinalis amplissime, ut vehementer Te etiam atque etiam rogem, ut quo animo universam studiosorum

rum hominum nationem prosequi soles, eodem Tu hanc lucubratiunculam excipias, qua acceptorum officiorum, quoniam parem gratiam referre minime licet, & gratum & memorem apud Te probari cupio; sciamque Tibi ea accepta esse, quæ pro suis quisque viribus ac facultatibus facit, modo pietas, ac mentis integritas accedat.

Romæ Pridie Kal. Majas MDCCXXXVIII.



P R Æ F A T I O



NUNUS ferme est elapsus decimus quartus, Lector benevole, ex quo lucubrationem hanc de MONOGRAMMATE CHRISTI DOMINI confeci, eamque etiam tum typis daturus eram, ut ex geminis Censorum adprobationibus per id temporis exaratis videre licet, cum ad alia cogitanda scribendaque avocatus, inter adversaria opellam seposui, ut tandiu delitesceret, dum lucem aliquando aspicere potuisset. At ex insperato divini numinis providentia non post longum annorum curriculum votis meis obsecundavit. Simul enim ac in Urbem sacram, a qua me anno superiori meæ jacturæ divulserant, summa CLEMENTIS XII. PONT. MAX. munificentia, fovente maxime, meque in clientelam suam recipiente NEREO CORSINO S. R. E. Cardinali amplissimo, ejusdem Pontificis fratris filio, sum revocatus, ut veluti in tuta ac tranquilla statione positus, intermissis rerum Ecclesiasticarum studiis rursus vacarem, ad eam edendam, quoniam per otium licuit, adjeci animum. Iterum ergo illam in manus sumpsi, relegi, recognovi, adauxi, expurgavi, limavique, ac de novo veluti conflatam, prælo commisi. Si vero ex me

modo perconteris, quid causæ fuerit, cur censorium stilum in Jacobum Basnagium exercuerim, eam ab ipso Basnagio mihi allatam fuisse facile intelliges. Non ignoras, christiane lector, Jacobum Basnagium Calvinianæ sectæ hominem fuisse, qui in Galliis natus, ad Batavos A. D. 1685. confugit, apud quos sedem fixit, ac multis identidem scriptis, ac præsertim contra fidem catholicam, apud suos inclaruit. Inter opera, quæ edidit recensetur Historia Judaica, Gallice scripta, quæ primum prodiit Roterodami A. D. 1706. mox Anglice, versa; deinde auctior, & locupletior A. D. 1716. Hagæ Comitum recusa fuit. Hæc autem Historia secundis Basnagii curis adornata, nonnisi sub A. D. 1723. in manus meas pervenit. Ubi vero eam pervolutare coepi, permulta ibi, licet extra chorum, a Basnagio de Monogrammate Christi Domini, deque singularibus litteris, quæ in titulis monumentorum e sacris Urbis cœmeteriis eductorum aliquando occurrunt, prolixè disceptari deprehendi. Verum enimvero in tota illa satis longa digressionè, nihil aliud ab eo cõgitatum, nihil aliud actum, ac susceptum inveni, nisi ut in sacrosanctum Christi monogramma ac in sacra monumenta insultaret, atque viris præstantissimis de sacris antiquitatibus optime meritis dicam impingeret. Indigne equidem tuli, tam inique traduci originem sacratissimi monogrammatidis, quo veterrimi
illi

illi majores nostri, Christi nomen singularibus literis, invicem implexis efformatum, exprimi voverunt. Nempe novus hic Aristarchus protulit, monogramma Christi apud gentiles jamdiu ante *Constantinum* Augustum in usu fuisse, atque adeo a christianis minime excogitatum. In qua quidem absurda, ac teterrima adstruenda, tuendaque sententia, multa comminiscitur, falsa pro veris venditat, veterum scriptorum loca, ac monumenta, aut perperam interpretatur, aut misere vexat, præclaros viros deridet, fusque deque omnia vertit, ut legentium animos in suam opinionem abripiat. Hæc igitur in Christi nomen, in Urbis sacræ veneranda christianorum monumenta, ac in viros qui de iis scripserunt doctrina præstantes congesta mendacia, hæc errorum portenta, hæc tandem convicia ferenda erant? Hæc in vulgus, ac ad posteros libere vagari? Religio tum mihi incessit, statimque singulari scripto Basnagii conatus refellere coëpi. Interim vero ille diem clausit extremum xi. Kal. Januarias A. D. 1723. cujus rei nuncius fero ad me allatus est, nempe posteaquam in scripta ferè omnem hunc laborem redigissem. Quamobrem ab opella hac mea superfedendum tum non putavi, neque reprehensione dignum visum est, si eam nunc in lucem proferam, quamvis inter vivos non sit ille, in quem scripsi. Exempli enim & vetera & recentia non desunt

eorum , qui libris editis , eorum scripta contuderunt , qui jampridem obiissent . Habes ergo ex me paucis , qua de caussa , & quando in Basnagium stilum perstrinxerim , & cur usque adhuc disceptatio mea latuerit . Num justis armis decertaverim , ac hostem profligarim , proque merito ei vi-ces rependerim , tuum erit , christiane lector , judicium .



IMPRIMATUR,

Si videbitur Reverendissimo Patri Magistro Sacri
Apostolici Palatii.

Phi. Episcopus Pisauriensis Vicesgerens.

ADPROBATIONES CENSORUM

I

V. C. Dominici Georgii Dissertationem de *Monogrammate Christi Domini*, deque siglis in monumentis veterum christianorum, jussu Reverendissimi Patris Gregorii Selli, sacri palatii magistri, legi & probavi.

Romæ Kalendis Augusti 1724.

*Ego Justus Fontaninus.**

* Mox Archiepiscopus Ancyranus.

II

Perlecta jussu Reverendissimi Patris sacri palatii Apostolici magistri Dissertatione V. C. Dominici Georgii de *Monogrammate Christi Domini*, deque siglis in monumentis veterum christianorum nihil in ea reperi, quod religioni purisque moribus officiat, imo cum eruditissimus auctor ea sacra monumenta a novatorum maledicentia, ac obrectatione egregie vindicet, dignissimam censeo, quæ in lucem proferatur.

Romæ xvii. Kal. Decemb. 1724.

Franciscus Valesius.

ERuditam viri cl. Dominici Georgii Dissertationem de *Monogrammate Christi*, jubente Reverendissimo Patre Magistro sacri palatii attente legi: nihilque in ea offendi, quod fidei morumque regulis adversetur: propterea eam dignam judico, quæ publica luce donetur.

Romæ ad S. Mariam super Minervam, v. Idus Martii 1738.

*F. Joseph Augustinus Orsi Ord. Præd. Cathedra-
ticus Casanatensis.*

IMPRIMATUR.

Fr. Joannes Benedictus Zuanelli Ordinis Prædicatorum Sacri Palatii Apostolici Magister.

I N D E X

CAPITUM

CAPUT. I

Jacobi Basnagii sententia de Christi Domini monogrammate falsa & absurda enunciatur. Monogramma Christi quid. p. 1

CAPUT. II

Basnagius de origine monogrammatum refellitur. Origo vera petitur ab Apostolorum ætate. De litteris A & Ω. Cur Christus per has litteras designetur. Monogramma exaratum in monumentis Constantino Magno vetustioribus. 3

CAPUT. III

Monogramma in lucernis christianorum. Eæ adhibita in cæmeteriis. De his lucernis Fortunati Scacchii lapsus & palinodia. Casalius, Fortunius Licetus, Laurentius Ramirez, & Menckenius notati. Christi nomen in amuletis. 8

CAPUT. IV

Monogramma in anulis christianorum. De lemmatibus sacris in hujusmodi anulis. De more gestandi anulos. Monogramma in gemmis. Caroli Cangii sphalma. Crux in gemmis & anulis expressa. Monogrammate crucem contineri. 14

CAPUT. V

De monogrammate a Constantino M. in clypeis & labaro notato. Visio Constantini a calumniis vindicata. De nummis ipsius Constantini, Magnentii, Decentii, Vetranionis, & Constantii, in quibus monogramma. De figura monogrammatum ex Lactantio, Eusebio, & S. Paulino. Recta crucis figura in nummis. Num Licinius crucem in labaro pinxerit. Monogramma, signum appellatum. Visio Constantini M. asserta. 26

CAPUT. VI

De monogrammate in collaribus servorum. Basnagius inscite ea de re Fabrettum vellicat. Seroi gentiliū in fronte notati.

tati. Constantini lex, ne servis & noxiis in fronte stigmata inurerentur. Confessores Christi a tyrannis stigmatē notati. Milites stigmatē signati. Milites christiani signo crucis muniti ante prælium. 39

CAPUT. VII

Basnagii calumnia de monogrammate in nummis ante Constantinum depulsa. Ejusdem lapsus de numeris mysticis. De nummo Ptolemæo Cyrenensi regi tributo variæ sententiæ. 45

CAPUT. VIII

Basnagii error in Socratis & Sozomeni testimoniis afferendis. Ea testimonia expensa. De cruce decussata in symbolis Ægyptiorum. In his Basnagius falso monogramma agnovit. De Tau littera crucem significante. De nummo Domitiani Ipsiaco. Alia Basnagii errata. 46

CAPUT. IX

Fabrettus in his quæ scripsit de monumentis gentis Viçloriæ, & de B. Tertullini cæmeterio, a calumniis Basnagii vindicatus. De siglis D. M. & D. N. in antiquis lapidibus christianis, Basnagii argumentationes expensa. De Leopardi epitaphio a Mabillonio, & Fabretto vulgato. Infelices Basnagii conjecturæ de Pastoris symbolo. Inscite iterum a Basnagio Fabrettus reprehensus. 52

CAPUT. X

Basnagii lapsus in voce Depositus interpretanda. Quid apud veteres Depositus significaret. Quid item in monumentis christianis. Sirmondus a calumniis Basnagii defensus. Remus & Archontia christiani. Vignolius defensus. 63

CAPUT. XI

Basnagii impietas in sacra cæmeteria refellitur. Nunquam in his gentiles sepulti. Criminatio de gentiliū sepultura in cæmeteriis Christianis ob gentiliū epigrammata in eis quandoque reperta, eliminatur. An christiani funerum ritus, pompas funebres, libationes, & aquæ lustralis usum ab ethnicis sint mutuati. 68

1

D E
MONOGRAMMATE
CHRISTI DOMINI
DISSERTATIO
CAPUT. I

*Jacobi Basnagii sententia de Christi Domini monogrammate
falsa & absurda enunciatur. Monogramma
Christi quid.*





SEr hoc inter cætera in more positum institutoque hæreticorum, ut non modo sacros ritus, jam inde ab antiquissimis temporibus in Ecclesia catholica receptos, sed veterum etiam christianorum symbola, in præcæ ætatis monumentis ad posterorum memoriam consecrata, soleant aspernari, eaque ferme singula, seu ad pias, ut blaterant, fraudes referant, vel ab ethnicis accepta, superstizioso cultu aucta, temere nobis crimini vertant. Id quidem ante annos aliquot præstitit Jacobus Basnagius, qui dum alteram editionem Historiæ Judaicæ, Gallica lingua pridem a se A.D. 1706. editæ, auctiorem secundis curis A.D. 1716. vulgavit, veneranda monumenta, jam dudum e sacris Romanæ urbis cœmeteriis eruta, quæque in dies eruuntur, locique ipsius religionem evertere est conatus. Etenim hujus Historiæ lib. III. cap. XXI. §. III. pag. 617. quum de Cabala Ebræorum, deque eorum litteris anagrammaticis sermonem habeat, de Christi Domini nostri sacrosancto monogrammate obiter disputationem instituit, ac illud gentilibus etiam commune fuisse contendit.

II. Monogramma generatim, ut eruditi norunt, est nomen compendio descriptum, ac certis litterarum ambagibus implicatum, quod *magis intelligi, quam legi promptum* est, ut de suo monogrammate Symmachus lib. II. epist. XXI. agebat. Christi vero monogramma, ut neminem ferme fugit, duabus Græcis litteris constat, nempe littera P & littera X invicem inter se implexis: quibus sane litteris a priscis illis majoribus nostris ejus sacratissimum nomen denotari & exprimi in vetustis monumentis consuevit. Licet autem fateatur Basnagius litteras A & Ω sæpius in monumentis christianorum occurrere, ac per eas Christum Dominum, Joanne in Apocalypsi cap. 1. 8. testante, significari, eo tamen Christi monogrammate usos etiam ethnicos affirmat, idque indigesta ac perplexa disceptatione probare & definire molitur. Multa ex ingenio juventoque suo adversus doctissimos viros Jacobum Sirmondum, Joannem Mabillonium, & Raphaellem Fabretum de siglis in christianorum inscriptionibus, inter se minime cohærentia, in medium protulit, quorum ego indignitate commotus, ut, qui debetur urbis sacrae cœmeteriis honos habeatur, ea singulari scripto refellere constitui. Hoc ut faciam, Basnagii momenta ordine recensere ac expendam, quo commodius in confusa verborum congerie latens falsitasprehendatur; ac interim illud statuo, quicquid Basnagius de Christi monogrammate, deque singularibus litteris in lapidibus christianorum exaratis, differuit, id omne falsum, seu temere affirmatum, aut commentitium esse. In qua quidem sententia refellenda, multa de eodem argumento prosequi necesse erit, ex quibus certe constabit, multo ante Constantinum Magnum, Christi monogramma in usu apud christianos fuisse, nec indotius quidquam absurdiusque istis esse commentis, quæ Basnagius excogitavit.

CAPUT . II

Basnagius de origine monogrammati refellitur . Origo vera petitur ab Apostolorum ætate . De litteris A & Ω . Cur Christus per has litteras designetur . Monogramma exaratum in monumentis Constantino Magno vetustioribus .

UT igitur pressius cum Basnagio pedem conferamus , qui nihil distinguit inter monogramma , quod Constantinus Imperator in labaro effinxit , ab eo quo Gentiles ante Constantinum usi sunt , demonstrandum nobis est , venerandum Christi monogramma apud christianos longe ante Constantinum usu receptum ; Paganorum vero monogrammata , instar Christi monogrammati conformata , longe aliud significare . Proferenda sunt in primis Basnagii verba , ne sublextæ fidei argui videamur . Ea porro Latine reddita , sic habent : *Visuntur frequenter in sepulchris christianorum litteræ A & Ω , ad Christum Jesum indicandum , qui in Apocalypsi hoc nomen præfert . Nil post Constantinum notius est ,*

quam Jesu Christi monogramma  *, aut*  *. Attamen nemo se decipiat ; Gentiles enim , eo quoque usi sunt .* Hæc dum oggerit Basnagius , incitiam , aut certe petulantiam prodiit suam , quandoquidem ignorat , aut dissimulat ea , quæ viri doctissimi , qui hanc spartam exornarunt , cujusmodi sunt Jacobus Gretserus , Justus Lipsius , Antonius Bosius , Laurentius Pignorius , Jacobus Bosius , Paulus Aringhius , Raphael Fabrettus , & qui inter vivos paucis ab hinc annis agebat magni nominis Senator Florentinus Philippus Bonarotius , litteris prodidere . Parcant interim mihi , si ad calumnias atque fabulas depellendas , ea commemoranda erunt , quæ viri clarissimi toties enarraverunt .

II. Ab ipsis igitur Apostolorum temporibus , morem inductum , ut per contractas ac symbolicas litteras , Christi

nomen effingeretur, superioribus annis docuit Senator Bonarotius in Præfatione ad præstantissimum opus observationum in fragmenta vitreorum vasculorum, in cœmeteriis sacrae urbis reperta, pag. XIII. & XIV. Censet enim in Oriente id signum originem habuisse, ubi primum fideles, *christiani* vocari cœpti sunt, quo quidem nomine, tanquam symbolo in litteris Ecclesiasticis uterentur. Huc referendum illud Joannis Apocalypseos cap. VII. 2. ubi signum electorum, *signum Dei vivi* dicitur; huc illud cap. XIV. 1. ubi electi comitantes *agnum*, habebant in frontibus scriptum nomen ejus, & nomen Patris ejus: quæ si cum signo, de quo Ezechiel cap. IX. 4. 6. conferantur, apprime Christi monogrammati accommodari dicemus.

III. Ad hæc cum eodem V. C. ipsa Joannis ætate, morem obtinuisse arbitror, ut litteræ A & Ω monogrammati interponerentur, de quibus sane litteris frequenter idem Apostolus Apocalypseos cap. I. 8. cap. XXI. 6. cap. XXII. 13. Cur vero Dominus noster per extremas hæc litteras designari voluerit, rationes afferunt Tertullianus de monogamia cap. v. Clemens Alexandrinus lib. I. Pædagog. cap. VII. pag. 98. & Stromatum lib. IV. prope finem, pag. 537. editionis Parisiensis, S. Paulinus natali XI. vers. 648. & Prudentius Cathemerinon hym. IX. vers. XI. quia nimirum principium & finis est omnium rerum.

IV. His, ex ipsis divinarum Scripturarum libris, quibus per duas hæc litteras, ac per venerabile illud signum, Deum ac Dominum nostrum significari, ipso Basnagio minime reluctante, comperimus, fundamenti loco positis, ad alios testes, & vetustate, & fide præstantissimos, nimirum ad prisca christianorum monumenta, ex eorum dormitoriis educta accedamus, quæ putidissimi mendacii Basnagium arguunt. Adeantur, rogo, illustres Romæ subterraneæ auctores Antonius Bosius lib. III. cap. XXIII. & lib. IV. cap. III. & Paulus Aringhius lib. III. cap. XXII. pag. 524. 525. cap. XXIII. pag. 566. lib. VI. cap. XLIII. pag. 642. Innu-

mera ab his monumenta in lucem proferuntur, in quibus sacrum Christi nomen litteris singularibus exaratum est. Inter cetera vero visitur Christi monogramma in sepulchrali lapide *Marii militis*, passi sub *Hadriano Imp.*, & *Alexandri martyris* sub *Antonino Pio*, quorum epitaphia leguntur apud Bosium lib. II. cap. XXII. & apud Aringhium lib. III. cap. XXII. pag. 524. 525. Sculptum quoque erat monogramma Christi in tumulo *S. Caji Papæ*, martyrio functi sub *Diocletiano*, cum ejus reliquæ inventæ sunt in cœmeterio Callisti A. D. 1622. die XXI. Aprilis, cujus inventionis memoriam commentariolo illustravit Cæsar Becillus Congregationis Oratorii presbyter, & perstrinxit breviter Aringhius lib. III. cap. XI. pag. 454. & lib. VI. cap. XLIII. pag. 642. Appositum etiam fuit epitaphio *S. Primitii* martyris, ab Aringhio lib. III. cap. XXII. pag. 592. allato, ubi *fortissimus martyr* appellatur; & vasculum cum sanguine reconditum, elogiumque martyris, *Primitium* inter persecutionum procellas cæsum fuisse, dubitare non sinunt. Duo alia insignia monumenta Fabrettus Inscriptionum cap. X. pag. 738. 739. profert, in quorum altero *Ermetis martyris* nomen, interjecto monogrammate, exhibetur; in altero ex schedis Barberinis exscripto, ubi & martyris nomen legitur, monogramma inter litteras A & Ω medium est, hoc modo.



SAN O MARTYRIBVS PETRO IPSO

QVI VIXIT AN. X. ET PASSVS EST XIII. KAL. FEBR.

His addatur alter sepulchralis lapis, hoc sacratissimo symbolo praefulgens, non multis ab hinc annis e cœmeterio Priscillæ effusus, & a Marco Antonio Boldetto Observat. ad cœmeteria sacra lib. II. cap. IV. pag. 370. luci donatus. In loculo autem erant ossa *Laurentii martyris*, inclusa pariter in ejus urnula, ampulla cum sanguine, quo vel ipsi hæretici fa-

ten-

tentibus, tanquam firmissimo argumento, martyrium designatur. In quo quidem lapide monogramma conspicitur, ad latus malleolus cum cultro, quæ instrumenta, ideo mihi videntur impressa, ut significaretur, *Laurentium*, veluti Christi victimam, Deo fuisse mactatum, & hoc pacto deriderentur Gentiles, qui malleo & cultro in mactandis victimis utebantur. Has porro sacras exuvias una cum lapide, & ampulla sanguine confersa, Romæ dono accepit Jo: Dominicus Bonomius, qui eas in patriam suam Ripam Transonis, Piceni urbem transtulit, & in æde Monialium S. Catharinæ Senensis collocavit. Epitaphium vero, in quo sculptum est monogramma Christi, ad fidem ipsius lapidis descriptum, sic habet.

LAURENTIV

VI IDVS IE

^{sc}
NVRAS

DECESSIT



V. Hæc licet satis per se Basnagii sententiam convellant, certam amplius firmamque apud Christicolas veterriam consuetudinem monogrammatiss scalpendi, reddere conabor. Nam **permulta alia** nobis suppetunt magni momenti, quibus heterodoxi, ni plane desipere velint, acquiescere vel inviti debent. Ea mox uberius exponam. Nulli non patet, inter effodiendam humum, in cryptis sanctæ urbis, reperta identidem vasa, calices, anulos, & alia id genus, quæ martyrum Christi, aut fidelium priscorum fuere, hujusmodi locis latitantium. A vas vitreis ordianur, quorum antiquitatem disquirens Bonarotius, animadvertit pag. xii. fragmenta illa vitrea, quæ illustrat, **educta esse ex an-**

antris, seu cameris, alta humo congeſtis: qui ſane terræ acervus, quum poſt pacem Eccleſiæ redditam in eas ſpeluncas inveſtus eſſe non poſſit, quod Romani Pontifices magnam erga eadem loca obſervantiam geſſerint, propterea iſtis perſecutionibus adhuc ſævientibus, ac Imperatorum jūſſu terra obruta fuiſſe ob inſitum in Chriſtianum nomen odium, merito idem V. C. arbitratur. Explorata res eſt, Imperatores ſæpe chriſtianis, ne in cœmeteriis quidem ſecure habitare poſſent, interdixiſſe. Id monet lapis *Alexandri martyris* ſub Antonino, id Tertullianus ad Scapulam cap. III. de perſecutione Severi, id Eufebius Hiſtor. Eccl. lib. VII. cap. XI. de Valeriano, & lib. IX. cap. II. de Maximino.

VI. In his vitris ſæpe Chriſti monogramma obviam fit, ac inter alia Bonarotius pag. XIII. memorat *ſcyphum* ſanguine tinctum e cœmeterio Calliſti erutum, in quo inter has litteras ASIN*PRE, Chriſti monogramma cernitur, cujuſmodi eſt etiam apud Aringhium lib. III. cap. XXII. vas, ſanguinem & cineres S. *Almachii* ſervans, in cœmeterio Calliſti itidem repertum, ubi monogramma delineatum aſſabre eſt. *Patera* vitreæ fundum, incorrupto ſanguine obduſtum, haud ita pridem vulgavit Boldettus lib. I. cap. XXXIX. tab. III. num. 2. pag. 194. In eo ſiquidem fundo ſive ima parte piſtæ ſunt imagines Sanctorum Apoſtolorum Petri & Pauli, media inter eos adſtante columna, in cujus vertice Chriſti monogramma ſtatuitur. Huic fere ſimilem in vitro piſturam propoſuit etiam Bonarotius tab. XIV. fig. 2. pag. 86. qui pag. 57. præmonuerat, ideo in ſublimi Chriſti nomen in hoc vitro adumbratum, nimirum, ut ad illud Apoſtoli Philipp. cap. II. 9. piſtores reſpexerint, quo docemur, Chriſto donatum *nomen ſuper omne nomen, ut in ejus nomine omne genuſſectetur*.

VII. Ex his evidentiffime patet, quam gravis ſit Baſnagii, eorumque lapſus, qui monogrammatici originem a Conſtantino eſſe volunt. Quis enim, niſi mente prorſus, &

oculis captus sit, non fateatur, multo antiquius Constantino Christi monogramma, quum illud inspexerit in sepulcralibus monumentis *Marii martyris*, Hadriano imperante, *Alexandri* itidem *martyris* sub Antonino Pio, *Caji* Papæ sub Diocletiano, dein *Primitii*, *Ermetis*, & *Laurentii* inter diras Ecclesiæ persecutiones cæsum; & qui illud inspexerit in vitris, martyrum sanguine adhuc rubentibus? Quid tandem verum dicemus, ubi eo devenerimus, ut tam vetusta, ac tam veneranda monumenta insuper habeamus? Fides omnis ac dignitas priscorum monumentorum nutet ac labatur, necesse est, si hæc inficiabimur. Amandentur igitur procul hæc somnia, ac interim gradum capeamus ad domesticas christianorum res, quas Christi monogrammate insigniverunt.

CAPUT . III

Monogramma in lucernis christianorum. Eæ adhibitæ in cœmeteriis. De his lucernis Fortunati Scacchii lapsus & palinodia. Casalius, Fortunius Licetus, Laurentius Ramirez, & Menckenius notati. Christi nomen in amuletis.


Primum ad ea, quæ modo proposuimus confirmanda locum tribuimus lucernis, in cœmeteriis identidem detectis; iis enim antiquos fideles usos esse, seu ad vigilias martyrum celebrandas, seu ad tenebras e cryptis dispellendas, inflexasque viarum semitas illustrandas, jam pridem veterum testimonio docuere viri christianæ antiquitatis peritissimi, ac inter eos facile princeps Cæsar Cardinalis Baronius ad A.D. 58. num. 25. & sequentibus, Fortunatus Scacchius sacrorum Elæochrismaton myrothecio l. cap. vii. & Paulus Aringhius lib. i. cap. xviii. In his lucernis, quæ partim fictiles, partim æneæ in cœmeteriis reperiuntur, christiana symbola, puta columba, aut monogramma Christi, ut plurimum conspiciuntur. Harum icones plerique ediderunt, quas si oculis perlustrare cupis, adi Bosium lib. iii. cap. xxiii.

cap.xxiii. a pag.203. ad 211. Aringhium lib.vi.cap.xxiii. pag. 571. Jo: Petrum Bellorium in Observationibus ad veterum lucernas sepulcrales Part. i.II. Michalem Angelum Cauleum, Fortunium Licetum, aliosque, qui de veterum lucernis scripsere. Quis autem erit tam impudens, aut iniquus rerum æstimator, qui monogramma in lucernis hujusmodi, aliud quam Christi nomen significare, seu a gentilibus potius effectum malit, aut demum symbola in his christianorum lucernis expressa, ad ethnicorum symbola referre? Id quidem exciderat Fortunato Scacchio sacrorum Elæo-chrismaton myroth. i. cap. vii. pag. 55. ubi, quum eçtypon lucernæ dedisset, in qua jacet *Jonas nudus sub cucurbita*, ac supra monogramma Christi catenulæ illigatum dependens, eam ipse imaginem lascivientis *Veneris*, & ad lupanaris usum factam putavit. At postea vir doctus, errore agnito, in fronte Operis palinodiam cecinit, se deceptum sincere fassus, figuramque non *Veneris*, sed *Jonæ* esse pronuntiavit. Hic enim ad resurrectionis symbolum tradendum passim priscis fidelibus proponebatur, qua de re multa scitu digna proferunt Bosius lib. iv. cap. xxi. & Aringhius lib. v. cap. xxii. dum *Jonæ* imagines in cœmeteriis, & sarcophagis exaratas interpretantur. Jure autem quivis mirabitur Jo: Baptistæ Casalii oscitantiam, qui cap.xxv. pag.84. de veteribus Ægyptiorum ritibus, dum laudat lucernam ejusmodi in museo Francisci Gualdi Ariminensis, tunc exstantem, nudam imaginem ad lascivientem feminam, & Christi monogramma ad rotam, qua vitæ curriculum conficitur, incaute refert. Eodem modo corrigendus est Fortunius Licetus, quod lib. vi. cap.xxx. de lucernis reconditis verba faciens, magna quidem confidentia, lucernas, in quibus monogramma conflatum cernitur, nisi hinc & inde ad latera A & Ω habeant, gentilium temporibus inconsiderate assignaverit; quapropter temeritatis & audaciæ merito arguitur a Jo: Burchardo Menckenio, licet a catholica fide alieno, in Diatriba de monogrammate Christi c.1. §.5. edita Lipsiæ A.D. 1696.

II. Quæ quum ita sint, deceptum constat Laurentium Ramirez, qui in notis ad Luitprandi Chronicon pag. 363. scripsit, has siglas A Ψ Ω ideo in sepulcris antiquitus politas, ut christianorum conditoria ab Arianorum tumulis distinguerentur, propterea quia hisce litteris, Christi divinitas ostendebatur, quam Ariani negabant. Memoria quoque lapsum censeo Menckenium in Diatriba de monogrammate cap. II. §. 2. dum asserit, *Constantini* ætate tantummodo usurpari cœptas litteras A & Ω , quippe quod is primus Christi monogramma inter A & Ω delineaverit. At uterque falsi arguitur, si originem harum litterarum symbolicarum spectemus; nam hæ litteræ certo certius Christum significant, & visuntur in monumentis *Constantino* vetustioribus, ut liquet ex lapide, quem supra ex Fabretto produximus, ex fundo pateræ, sanguine comperso, in cœmeterio Callisti invento, cujus ectypon dedit Boldettus lib. 1. cap. xxxix. tab. 3. num. 4. pag. 194. Cæterum non negamus, ab Arianis de industria has siglas omissas.

III. Ut autem ad lucernas, Christi Domini monogrammate insignitas redeam, bono certe fato accidit, ut mense Novembri anni superioris, dum Venetiis decedens Pisaurum appulisset, ibique ab Illustrissimo viro Philippo Spada, Pisaurensi Episcopo, nunc ad vices in Urbe gerendas Eminentissimi Cardinalis Vicarii adlecto, benigne hospitio exceptus, paucos dies constitissem, Museum Jo: Baptistæ Passerii Juris consulti inviserem, in quo ingens lucernarum fictilium numerus asservatur, in suburbanis Romanæ urbis identidem effossarum, quas V. C. summo studio ac industria per multos annos, partim a se, partim amicorum ope conquisitas collegit. In his pleræque christianorum veterum lucernæ visuntur, in quibus non uno modo monogramma Christi efformatum est. Passerius, qua summa est humanitate, aliquot earum ectypa mihi libenter obtulit, quorum quatuor æri incidenda curavi, & in sequenti tabula exhibui.

I



2



3



4



Quæ numero primo lucerna visitur, insigne quidem sacrae antiquitatis monumentum, ac auro pretiosius mihi visum est; nam in medio disco hastile labari cernitur, in quo tabella cum lemmate EN TOYTΩ NIKΑ, idest IN HOC VINCE, ac supra monogramma Christi Χ medium inter gemmatam corollam. Hinc inde ad labari latera duo milites galeati stantes, sinistra hastam, dextera clypeum, in imum defixum tenentes: in summo demum lucernæ ambitu corona laureata, in qua duo orbiculi, seu duo capita galeata, gemmarum loco interdistincta sunt. Lemma porro illud ipsum est, quod Eusebius in vita Constantini lib. i. cap. xxiii. antiquæ editionis & versionis, qua usus est Baronius, refert, ubi de celebri Constantini M. visione verba facit: *Quum jam, inquit, Sol ad medium cælum ascendisset, diè in pomeridianum tempus paululum inclinante, dixit, se signum crucis ex lucis splendore figuratum in ipso cælo, Soli imminens, manifestò oculis aspexisse, inque eo inscriptionem consignatam, quæ hæc verba completebatur: EN TOYTΩ NIKΑ, IN HOC VINCE.* Deinde Eusebius cap. xxxi. figuram monogrammatiss, quam post hanc visionem Constantinus effingendam curavit, ita describit: *Hastile oblongum erat, erectumque auro undique obductum fuit, quod cornu habuit transversum, ad firmam crucis constructum, supra in fastigio ejus Salvatoris nota inscripta, duobus solum expressa elementis, idest duabus primis litteris Græcis nominis Christi. Erat & in medio litteræ Χ curiose & subtiliter inserta, quæ totum Christi nomen perspicue significarunt.* Viden' in hac lucerna, Eusebii Historiam de visione Constantini adamussim expressam, adeo ut hoc insigni monumento Eusebius ipse, ejusque auctoritas hac in re, quæ a novatoribus in dubium vocari cœpit, mire fulciatur, & communita sit? Quin etiam typus hujus lucernæ omnino convenit cum Constantini numismate apud Baronium ad A. D. 312. ubi in averfa visitur in area numismatis hastile longum, cui infixi sunt aliquot orbiculi militares, cujusmodi in plerisque laborum figuris occurrunt;

runt ; in summo labari fastigio , velum in quo Christi monogramma ✠ . Hinc inde quoque ad labari latus milites duo galeati stantes , dextera *batillis* , & sinistra , *clypeo* innixi . Apprime ergo cum vetustis aliis monumentis , & cum Eusebio hæc elegantissima lucerna congruit ; ex quo intelligis , quanti a sacrarum antiquitatum cultoribus hujusmodi lucernæ imago facienda sit : quum ex ea etiam falsæ conjecturæ Jo: Alberti Fabricii in Exercitatione critica de cruce Constantini M. §. XI. Bibliothecæ Græcæ tom. VI. pag. 28. de verbis *Hoc vince* , evanescant . Quæ num. 2. lucerna statuitur , monogramma , unica linea transversa litteram *Rho* dissecante , effingit . Quæ num. 3. monogramma exprimit , linea recta , & cruce decussata dissectum . Quæ num. 4. gemmatam crucem demonstrat , littera *Rho* per lineam rectam trajecta . Fuit olim hæc lucerna V. C. Raphaelis Fabretti . Vide insuper , si lubet , trium lucernarum fictilium typos cum monogrammati signo , linea tantum recta intersecto , & gemmatæ crucis figuram exhibente , quas ex domestico Museo , Romæ in lucem protulit A. D. 1737. Franciscus Eques Victorius in Commentario ad nummum æreum veterum Christianorum pag. 53. 54.

IV. Proximum post lucernas locum damus æreis quibusdam orbiculis , seu numismatibus , hoc salutari nomine prænotatis , quæ prisca Christifideles , amuletorum instar , collo suspendebant . Iconem ejuscemodi amuletorum , in modum numismatis cum foramine in ora extrema , ex cœmeteriali tumulo eruto , ubi venerandum martyris corpus recondebatur , contemplandam obtulit Aringhius lib. VI. cap. XXIII. Servatus & hic mos diu post pacem Ecclesiæ redditam . Sancta Genovefa celebris virgo Parisiensis , & Galliarum tutelar , nummum æreum cruce insignitum , quem S. Germanus Autisiodorensis Antistes ei gestandum dederat , semper collo suspensum gestare consuevit . Id refert vetustus auctor vitæ ejusdem S. Genovefæ , in hæc verba : *S. Germanus nummum æreum , Dei nutu allatum , habentem signum*

signum crucis, a tellure colligens, pro magno munere dedit, inquiring ad eam, hunc transformatum pro memoria mei, a collo suspensum semper habeto, nulliusque metalli, neque auri, neque argenti, sed cujuslibet margaritæ ornamento collum digitosque tuos ornari patiaris. Hæc eadem de S. Genovefa confirmat Stephanus Tornacensis epist. CLXI. At virgo nostra, inquit, dum adhuc viveret, carnales sprexit illecebras, & pro gemmis & auro, nummum æreum titulo crucis insignem, quem Dominus Autisiodorensis Germanus in signum sponsalitiarum cum Christo, loco arrharum collo ejus suspenderat, omnibus præposuit deliciis, omnibus divitiis antegessit. Vides priscum morem, & apud viros, & apud christianas feminas collo sacra amuleta gestandi, Christi monogrammate, seu ejus cruce insignita.

CAPUT. IV

Monogramma in anulis christianorum. De lemmatibus sacris in hujusmodi anulis. De more gestandi anulos. Monogramma in gemmis. Caroli Cangii sphalma. Crux in gemmis & anulis expressa. Monogrammate crucem contineri.

HIs de christianorum lucernis symbolicis, deque amuletis, in quibus Christi monogramma conspicimus, explicatis, nunc ad aliud apud eos vetustum ornamenti genus, nimirum ad eorum *anulos*, qui monogrammatibus figura elaborati, frequenter in sacris cœmeteriis deteguntur, transitum faciamus. Primos Christifideles & in nuptiis celebrandis, & in rebus domesticis signandis, anulis usos esse, res est gravissimorum scriptorum auctoritate confirmata. Tertullianus enim de Idololatria cap. XVI. anuli pronubi christianorum meminit, & libro de cultu muliebri cap. V. hortatur christianas feminas, ut auri, argenti, & gemmarum ornatum abjicientes, ferreos anulos potius adhibeant. Vide præterea Clementis Alexandrini tritissimum testimonium

nium de anulis christianarum mulierum lib. II. Pædagogi cap. XI. ac inter recentiores Baronium ad A. D. 57. n. 17. qui pluribus agit de anulis e ruderebus cœmeteriorum effossis, & Christi monogrammate insignitis, prout & Aringhius lib. VI. cap. L. pag. 705. & 708. Vide etiam eclypon trium ex ære anulorum, in quibus monogramma Christi, nuper luce donatum ex Museo Victorio, in Commentario ære nummi veterum christianorum pag. 52. His autem anulis pronubis, præter Christi monogramma, lemmata quadam sacrum acclamandi modum denotantia, incidebantur, puta VIVAS IN DEO, & his similia, quæ identidem, in christianis monumentis leguntur. De anulo pronubo cum epigraphe: TECLA VIVAT DEO CUM MARITO seo fidem facit Petrus Gassendus in vita Nicolai Claudii Fabricii Peiresckii Senatoris Aquisextiensis lib. IV. pag. 303. Nuper in Museo M. Antonii Ansdei S. R. E. Cardinalis, A. D. 1730. vita functi, exstabat insignis anulus pronubus ex ære, in quo Christi monogramma delineatum erat, & in ejus orbe legebatur formula SPES IN DEO VIVAS. Hujus iconem dedit in Commentario de S. Columba pag. 78. V. C. Justus Fontaninus Archiepiscopus Ancyranus, de Sede Apostolica præclare meritus, quem supremum diem obiisse A. D. 1736. die XVI. Aprilis adhuc dolemus. Frequens porro est in litteratis lapidibus hæc acclamandi ratio. Ex cryptis Sanctæ Agnetis, & Cyriacæ dudum erutæ inscriptiones apud Boldettum lib. II. cap. VII. pag. 417. 418. 419. has formulas perhibent: BIBAS. IN. DEO. IN. DEUM. VIVIS. SPES. IN. DEO. VIBAS. IN. DEO. ET. ROGA. IN. DEO VIVES. Senator Bonarotius pag. 112. lapidem ex cœmeterio Sanctorum Petri & Marcellini profert, cujus initium præfert monogramma, & e vestigio lemma sequens & ISPES IN CHRISTO BONOSO. Verbum *spes* in acclamationibus a christianis usurpari consuevit, propter spem vitæ æternæ, & resurrectionis, quam habent. In sepulchrali itidem lapide ex Boldetto lib. II. pag. 344. alia ejusmodi accla-

clamatio legitur, cujus verba, ut oculis legentium recte subjiciantur, una cum ipsa inscriptione recudimus.



CONSTANTIA IN PACE QUE VIXIT ANNOS L
FECIT BENE

II. Eadem locutionis ratio occurrit in vitro, pictura ornato apud Bonarotium pag. 28. tab. v. fig. 1. ubi hæ litteræ in orbe habentur.

CONCORDI. BIBAS
IN PACE DEI

Solemnia item vitæ in Deo adprecandæ verba leguntur in elegantis formæ lucerna, quam Michael Angelus Causeus tab. III. de antiquorum lucernis, ex thesauro magni Etruriæ Ducis publici juris fecit. In modum naviculæ lucerna fabrefacta est, in cujus prora stat S. Petrus, ad puppim vero fedet S. Andreas, gubernaculum manu tenens; summitati mali appensa est tabella cum epigraphæ.

DOMINUS LEGEM DAT
VALERIO SEVERO
EUTROPI VIVAS

Hæc in eam sententiam Causeus interpretatur, ut videlicet *Valerius Severus* christiana religione imbutus, mortem constanti animo expectans, longiorem *Eutropio* vitam exoptet, more veterum, qui jam jam morituri, circumstantibus amicis dicere solebant: *Vivite, ac valete*.

Hu-

Hujusmodi adprecationibus, faustisque christianorum votis concepta est dedicatio Kalendarii, *Constantini* Imp. ævo confecti, olim inter rara Peiresckii cimelia, cujus mutilam partem primus edidit Ægidius Bucherius in libro de doctrina temporum pag. 274. hanc palmam Hieronymo Aleandro juniore, ob immaturam mortem, decerpens; dein integrum vulgavit A. D. 1671. Petrus Lambecius ex MS. codice Bibliothecæ Cæsareæ, in appendice lib. IV. pag. 276. In pictura ad hujus Kalendarii frontem, hisce verbis dedicatio concipitur.

VALENTINE FLOREAS IN DEO

In tabella vero, quam ibidem duo genii alati manu suspensam tenent.


VALENTINE. VIVAS. FLOREAS VALENTINE. VIVAS. GAUDEAS
--

Quinam iste *Valentinus* fuerit, se ignorare fatetur Bucherius, ex his tamen christianis adprecationibus christianum fuisse, jure censet. Recte quoque Lambecius scribit, *Valentinum* eundem esse, de quo Ammianus lib. XVIII. cap. III. quem Constantius Imp. injuriis primum, deinde honoribus affecit. In fundo patere vitreæ apud Boldettum lib. I. cap. XXXIX. tab. VIII. num. 30. pag. 205. picta sunt hæc verba.

HILARE. SEMPER. GAUDEAS

At ad anulorum sacra lemmata revertamur. In loculis cœmeteriorum almæ Urbis, anulorum, ac sigillorum impressiones sæpe inveniuntur, quæ quidem impressiones, aut solam

monogrammatitis figuram exhibent, aut circum ipsum monogramma SPES DEI. & SPES IN DEO. Vide sigilla hujusmodi apud Boldettum lib. II. cap. III. pag. 336. & in addendis pag. 806. Littera tamen monogrammatitis Græca *Rho* in his sigillis, loco P. Latini infervit. Nos hic unum ex iisdem sigillis maximi moduli, ex Boldetto producimus, ut ejus forma conspiciatur.



III. Ipsi denique *amuletis*, *christianisque tesservis* acclamationes sanctæ ac felicitis vitæ interdum insculptæ. In *tessera* ex Museo Claudii Molineti pag. 3. hæc verba habentur: VIVAS IN DEO. Inter *amuleta* a Sponio Miscellan. pag. 297. eadem formula VIVAS IN DEO non semel exarata visitur. Sigilla quoque ibidem num. III. HOSPITA FELIX VIVAS. & num. X. VITA TIBI. & UTERE FELIX. de qua postrema formula, faustum omen pronunciant, vide quæ habet Justus Fontaninus Archiepiscopus Ancyranus in Commentario de Disco Albano votivo pag. 55. 56.

IV. Neque vero, ut paullo ante monuimus, inter christianos in vivis tantum agentes hujusmodi formulæ usurpari consueverunt, sed in ipsis quoque sepulchralibus lapidibus frequenter incisa sunt lemmata illa. VIVAS IN DEO, & VIVAS IN CHRISTO. Inscriptio christiana apud Bonarotium pag. 166. VIVAS IN DEO DULCIS. Alia apud Boldettum lib. I. cap. XXIX. pag. 80. in cœmeterio Cyriacæ. VIVAS

INTER SANCTIS. Alia ibidem pag. 340. in cœmeterio Cal-listi. OLYMPIODORE VIVAS IN DEO ✠. Alia pag. 572. in bisomo ex cœmeterio Priscillæ. ÆMILIANE ROMANE VIBATIS IN DEO. Alia apud eundem pag. 344. quam nos paulo ante ex eo protulimus. Inscriptio insuper Græcis quidem litteris, sed partim Græca, partim Latina lingua exarata, in Museo Kircheriano, quam V. C. Antonius Maria Lupus, Societatis Jesu presbyter vulgavit in Dissertatione ad Epitaphium S. Severæ Martyris pag. 191. eamque Latine sic ille reddidit.

ERMAISCE. LVX. VI

VIS. IN DEO. DOMINO

CHRISTO. ANNORVM. X.

MENSIVM. SEPTEM.

Dolemus profecto sacræ antiquitatis jactura, eundem Lupum anno superiori Panormi obiisse. His addimus aliam veteris lapidis epigraphen, e sacris Urbis cœmeteriis erutam, quæ una cum reliquiis Sanctorum *Hilarii & Eraclii* Patavium A. D. 1688. transmissa fuit, Formatissimis litteris Eminentissimi Cardinalis Vicarii almæ urbis roborata, aservaturque nunc apud Moniales S. Claræ. Apographum hujus litterati lapidis a V. C. Jacobo Facciolato in Academia Patavina Dialecticæ professore, & amico nostro carissimo die *xxix. Decembris A. D. 1724.* datis ad nos litteris, accepimus. Est autem,

HILARI. VIVAS

IN DEO ✠

HERACLIE, COMPA

RISVAE BENEME

RENTI FECIT QVE VI

KIT ANNIS XX IN PA

GE LIBERI VIVAS IN



Dudum vero edita fuit hæc eadem in scriptio inter Ephemerides Reip. litterariæ, Venetiis quotannis cudi solitas, A. D. 1735. pag. 284. Notanda igitur in lapide formula IN DEO CHRISTO; ut & in alio ab Edmundo Martenio in Itinere literario Par. II. pag. 284. vulgato, qui in ædificanda nova Ecclesia S. Maximini Trevirensis repertus est. Ita enim habet:

HIC IACET PERPETVVS IN CHRISTO
DEO SVO PERBENEMERITVS
QVI VIXIT ANNOS XXV
LEONTIA MATER TITVLVM POSVIT IN PACE



Si christiani adhuc viventes, in spem vitæ æternæ & resurrectionis, formulis illis in rebus domesticis utebantur, quo magis in monumentis sepulcralibus, quando cum *Christo* in æternum se victuros sperabant?

V. At ad hujusmodi formulas apud christianos in rebus familiaribus, iterum reverti nos cogunt ipsa eorum convivia, in quibus benevolentiae testandæ causâ, ad singula pocula *Christum* invocare consueverunt. Id enim perspicuis verbis tradit Sozomenus lib. v. cap. xvii. pag. 622. dum narrat, christianos quosdam misere in idololatriam a Juliano Augusto dolose inductos, quorum flagitium quispiam detexit, quum nonnulli eorum qui crimen admiserant, *in convivio, ut fieri solet, sibi mutuo propinarent benevolentiae testificandæ causâ*, CHRISTVM AD SINGVLA POCVLA nominassent. Ex quo quidem colligimus, christianos priscos inter bibendum, *Christi nomen* invocasse, atque adeo probabiliter in poculis sumendis & propinandis formula illa sacra VIVAS IN CHRISTO usos esse. Huc enim spectare mihi videtur S. Gaudentius Episcopus Brixienfis serm. viii. ad neophytos, qui eos alloquens: *Sit, inquit, sermo Dei, & SIGNUM CHRISTI in corde, in ore, in fronte, inter cibos, in lacrimis, in cubi-*

cubilibus, in ingressu & egressu, in letitia & merore, ut juxta beatissimi Pauli doctrinam, sive manducatis, sive bibitis, sive aliquid facitis, omnia in nomine Domini nostri Jesu Christi, qui vos vocavit ad gratiam, faciat. Gentiles enim vivas tantum in conviviis usurpasse, nos docet Franciscus Bernardinus Ferrarius de veterum Acclamationibus & plausu lib. vii. cap. xiii.

VI. Non vagabor longius; unde diverti, redeo. Jam vero non modo in *anulis, amuletis, ac tesseriis* christianorum, sive æneis, sive ferreis, argenteis, aut aureis, Christi monogramma aut crucis signum procusum fuit, sed & in *gemma* etiam, quæ pro anulis gestabantur, quarum specimen Abrahamus Gorlæus in Dactyliotheca tab. 184. protulit. Eapropter Laurentius Pignorius, quum in gemmis antiquorum non semel monogrammatiss figuram, & signum crucis animadvertisset, miratur epist. i. pag. 5. Clementem Alexandrinum inter symbola, quæ anulis a christianis insculpta recensuit, Christi monogramma, & ipsam Christi crucem non retulisse: nisi dicas a Clemente id silentio præteritum, quod ab ipsis Ecclesiæ incunabilis id jam institutum fuisset, atque obvium tritumque esset. Quis enim ignorat, signum & figuram crucis vel a primo Ecclesiæ sæculo in omnibus ferme a christianis adhibitam? Hoc ab iis, qui de Cruce scripserunt uberrime pertractatum, nemo est qui nesciat: nos hoc loco, nonnulla tantum de gemmis cruce & monogrammate Christi insignitis, indicabimus. Ex Pignorio modo audivimus, non solum Christi monogramma, sed & ipsam figuram crucis Dominicæ in gemmis anularibus elaboratam. Quod ne gratis dictum ab eodem videatur, satis fuerit singularem gemmæ iconem inspicere, quam ex museo Jo: Smetii senioris Fortunius Licetus primus edidit in libris de antiquis schematibus gemmarum anularium, schemate LIV. pag. 390. ubi vera Christi Domini crux, apparentibus etiam clavorum foraminibus, inter duos pisces sculpta visitur. De hac gemma litteris eidem Liceto Nicolaus Heinsius

A.D. 1651.

A.D. 1651. Kal. Junii datis, falsus est, se in ea veteris christiani lipsanon agnoscere. Idem prorsus affirmat Smetius filius in antiquitatibus Neomagensibus pag. 32. & sequentibus, eamque pag. 53. perfectam putat, quo tempore Lactantius Crispi Caesaris in Gallia magister fuit. Sed quod ad nostram disceptationem maxime spectat, Christi monogramma *gemmis* inscriptum fuisse, tabula in utraque Gorkæi editione proculx ipsius oculis fidem faciunt.

VII. Non est autem hic prætereundum, a Carolo Cangio in Dissertatione de inferioris ævi numismatibus cap. xxiv. eclypon insignis gemmæ ex Ludovici Chalucii Dactyliotheca MS. memorari, in qua Christi monogramma delineatum est, addita epigraphe. SALV DOMI NOST AVG LVC. quæ in hunc modum explicatur: *Salus Domini nostri Augusti luget*. At ibidem laudat alterum ex eadem Dactyliotheca insignis gemmæ eclypon, ex quo conjicit, longe ante *Constantinum*, Christi monogramma nosci ac describi cœptum. Etenim in hac gemma effictum est monogramma, hinc inde adstantibus A & Ω, hisce in orbem incisis litteris SAL DO N ALEX FIL LVCE, hoc est; *Salus Domini nostri Alexandri filii Mammææ luget*. Et si vero Cangius, hanc gemmam sub *Alexandro* Mammææ filio cælatam affirmare nolit, fieri tamen potest, inquit, ut a viro christiano ejus ætatis sculpta fuerit, qui pro ejus incolumitate ad Christum preces fuderit, quandoquidem pro Imperatorum salute Deum deprecari christiani solebant; in quam rem Aëta S. Cypriani adducit: sed & perspicua apud Tertullianum Apologetici cap. xxx. & ad Scapulam cap. II. testimonia adstruunt, christianos pro salute Imperatorum Deum orasse. Attamen Cangius fatetur sibi negotium facessere vocem *Domini nostri*, quæ (sunt ejus verba) *omnino non est istius sæculi*. Adde etiam potuisset, a Lampridio in vita Alexandri cap. iv. tradi, eundem Alexandrum, *Dominum* se appellari vetuisse. Verum, hanc vocem in provinciis & urbibus frequentari cœptam secundo sæculo christiano, fuisse demonstrant

Eze-

Ezechiel Spanhemius Dissert. XII. de præstantia & usu numismatum pag. 484. & sequentibus, ad quem morem, inquit, Tertullianus Apologetici cap. XXXIV. respexisse videtur. Eminentissimus Norisius ante Spanhemium id etiam animadverterat; nam in Dissertatione de nummo Diocletiani cap. I. pag. 7. notat, *Augustos* jam inde ab imperio *Commodi*, *Dominos* a privatis plerumque vocatos, idque ex lapidibus Gruterianis monet, quibus alios ex Sponio in Miscellan. pag. 176. & 272. addit Spanhemius. Quin etiam *Alexandri Severi* nomen cum titulo D. N. hoc est, *Domini nostri* legitur in tabula Fratrum Arvalium apud Gruterum pag. CCXXI. I. Norisius in memorata Dissertatione scribit, subditorum adulationem privato jure hunc titulum Imperatoribus detulisse, primumque *Diocletianum* in nummis *Domini* epitheto usum. Spanhemius tamen ostendit, ex nummis haberi, *Aurelianum*, & *Carum* Augustos, *Dominos* simul & *Deos* dictos. Itaque nullam molestiam asserre debet vox *Domini* in hac gemma, cujus causa, & a viro minime christiano sculptam, neque post *Alexandri Severi* ætatem confectam, argumentari non licet.

VIII. Navus alius in Cangio agnitus est, ubi aliam gemmam describens, in qua *Jovis*, *Apollinis*, & *Diana* capita expressa sunt, cujusmodi in Deliorum nummis exhibuit Hubertus Goltzius tabul. XVII. in Insulis Græcis, impacto supra *Jovis caput*, Christi monogrammate, & circum ductis hisce litteris. VIVAS IN DEO F. conjicit, a paganis interdum monogramma, Deorum suorum imaginibus adscriptum. Nolum id, viro tam docto, ac tam præclaro excidisset. Christum a paganis interdum usurpatum non negamus; sed omnino contendimus, apud eosdem, ne per somnium quidem, significasse, quod apud christianos significabat, nimirum venerandum Christi nomen. Cangii sphalmata aliqua ex parte detexit Gisbertus Cuperus, licet a catholica fide alienus; nam in notis ad Lactantium de Mortibus persecutorum, pag. 239. utriusque gemmæ interpretationem, a Cangio tentatam

tatam expendit, licet in eo fallatur, quod existimet; gemmam ubi compendiariis litteris ALEX, idest *Alexandri* nomen legitur, nullo modo ad *Alexandrum Severum* referri posse, sed potius ad unum quempiam ex *Alexiis* Imperatoribus, qui sæculis posterioribus in imperio orientali floruerunt. At id vix ferri potest in Cupero, viro antiquitatis peritissimo; nam & delineatio gemmæ barbæ confecta fuisset, & litteræ in orbe, seu summo disco, non Latinæ, sed Græcæ essent, si ad *Alexios* ea protrahi deberet. Jure tamen optimo arbitratur, secus atque Cangius, epigraphen alterius gemmæ, aperte indicare, a christiano sculptam esse, eumque Deorum capitibus monogramma Christi imposuisse, ignarum quorum capita forent, seu ut hac ratione rem profanam in sacrum usum converteret.

IX. At ad *crucis signum* in gemmis & anulis christianis olim insculptum revertamur; de quo vetustissimo more, quum aliqua superius attigerimus, unum tantum Eusebii locum hic addemus. Is ergo lib. vi. Demonstrationis Evangelicæ cap. xxv. ut ostendat, prophetias de Christi adventu & ejus morte jampridem adimpletas, christianos in anulis pro symbolo *salutare signum*, idest *crucem* gestare tradit: Denique, inquit, *post omnia hæc, quis inspiciens omnes quicumque in Christi fidem venerunt, salutari signo pro anuli nota utentes, non merito obstupefcit, si audiat, tanto ante ipsum Dominum dixisse: „ Et venient, & videbunt gloriam meam, & relinquam in eis signum. En vulgatissimum morem, ut ad Christi fidem venientes, in anulis pro symbolo, salutare signum gestarent; quo quidem nomine Christi crucem donari a Sanctis Patribus, patet apud Gretserum lib. iv. de cruce cap. lxiv. Quid autem si in salutari signo, de quo Eusebius, ipsius monogrammatæ figuram designari dicemus? Id ex Eusebio ipso conjicimus, qui lib. i. cap. xxxi. de vita Constantini, signum illud, instar crucis, in cælo Constantino ostensum, describens, quod non aliud est, quam monogramma, duabus Græcis litteris context-*

textum, *salutaris appellationis signum* vocat. Quum enim Eusebius monogramma indefinite, ut animadvertit Bonarotius in Præfatione pag. xiv. *signum salutaris appellationis* nuncupet, satis demonstrat, se de monogrammate loqui, & ut de re apud christianos notissima, apud quos multo ante, crucis instar erat.

X. Porro sanctissimum Christi monogramma, & jamdiu in Ecclesias inductum, & perinde ac ipsam Christi crucem habitum, locupletissime testatur S. Paulinus Nolanus Episcopus Nat. xi. de S. Felice, qui integer A. D. 1697. Mediolani prodiit. Accipe igitur, quæ præclarus Nolanus Antistes in rem hanc cecinit eodem Natali ver. 608.

*Ante tamen, quia res hæc postulat, ipsius instar
Enarrabo CRUCIS, qualem & pictura BIFORMEM
PINGERE CONSUEVIT, baculo vel stante bicornem;
Vel per quinque tribus dispansam cornua virgis.
Forma crucis gemina specie componitur, & nunc
Antennæ speciem, navalis imagine mali;
Sive notam Græcis solitam signare trecentos
Explicat existens, cum stipite figitur uno,
Quaque cacumen habet, tranverso veste jugatur.
Nunc eadem crux dissimili compacta paratu
Eloquitur DOMINUM tanquam MONOGRAMMATE
CHRISTUM.*

Hæc per se adeo perspicua sunt, ut commentariis non egeant, nisi forte apud eum, qui hæc eadem intuens, *jumo superba contentionis oculos perdiderit*, ut Augustini verbis lib. 1. contra Julianum, Oper. imperfecti cap. cxiii. utar.

XI. Hactenus igitur falsas Bashagii conjecturas de origine & usu monogrammatis, tum monumentis ex omni ferme antiquitate petitis, tum locupletissimorum testium auctoritate explosimus: quæ partim animadversa jamdudum a Jo: Burchardo Menckenio, homine hæretico, tanti apud eum fuerunt, ut aperte pronunciaverit in Diatriba de mo-

nogrammate cap. II. §. 3. *extra dubium esse, in primis fere christianis in cunabulis, frequentem fuisse hujus monogrammatis usum, cujus vel martyrum epitaphia, documenta præbent, omni scripto perenniora.* Recte item idem Menckenius paullo ante monuerat, ut monogramma, christianorum peculiare signum esse declararet, illud identidem conjungi cum symbolis apud christianos olim receptis, puta cum *pisce, columba, palma*, & his similia.

CAPUT . V

De monogrammate a Constantino M. in clypeis & labaro notato. Visio Constantini a calumniis vindicata. De nummis ipsius Constantini, Magnentii, Decentii, Vetranionis, & Constantii, in quibus monogramma. De figura monogrammatis ex Lactantio, Eusebio, & S. Paulino. Recte crucis figura in nummis. Num Licinius crucem in labaro pinxerit. Monogramma, signum appellatum. Visio Constantini M. asserta.

IN superioribus satis indigitavimus, *Constantinum Augustum*, auctorem non fuisse venerandi Christi nominis, compendio efformati, neque hoc primum sub ejus imperio innotuisse. Nunc pro certo habendum esse ostendemus, hunc eundem Augustum, post visum, quod habuit, antequam cum *Maxentio* congrediretur, *cæleste signum*, & in *scutis*, & in *labaro* notasse, uti testes omni exceptione majores sunt Eusebius lib. I. cap. xxviii. & xxix. de vita Constantini, Publius Optatianus Porphyrius in Panegyrico Constantino dicto, & Lactantius de Mortibus persecutorum cap. xliv. pag. 267. qui perspicuis verbis, quæ prælium cum Maxentio præcesserunt, describens, ait : *Commotus est in quiete Constantinus, ut cæleste signum Dei notaret in scutis, atque ita prælium committeret. Fecit, ut jussus est, & transversa X littera, summo capite circumflexo Christo,*
in

in scutis notat. Nec aspernandus nobis est auctor vitæ S. Artemii Ducis Ægypti, qui *signum* illud, quod ostensum fuerat *Constantino*, ab Artemio quoque conspectum narrat, idque coram *Juliano* Cæsare factum esse. Constans præterea eruditorum opinio est, pium Imperatorem Constantinum, omnium primum hoc eodem signo monetam publicam signasse. II itaque audiendi omnino non sunt, immo explodendi, qui Eusebii fidem de visione Constantini in dubium vocant; & merito Stephanus Baluzius in notis ad memoratum Lactantii locum pag. 96. indignatur, a quibusdam Eusebium, & auctorem vitæ S. Artemii male traduci, audacemque nimium fuisse conqueritur Jacobum Oiselim, dum in thesauro antiquorum numismatum pag. 463. visionem illam ad pias veterum fraudes retulit: *Quid enim deinceps*, Baluzius clamat, *verum censetur, si historiam hanc, quæ Lactantii, Publii Optatiani Porphyrii, ac veterum etiam numismatum testimonio nititur, inter fabulas, & pias veterum fraudes connumerare fas fuerit? Religiosius ista tractanda sunt, & irreligiosa illa temeritas procul abesse debet a pectoribus christianorum*. Hæc Baluzius, vir minime in fabulas propensus, contra nebulones istiusmodi, qui in hanc certe sententiam sunt coercendi. Verissime igitur nos docet Eusebius lib. I. de vita Constantini cap. xxxii. xxxviii. & xl. hoc signum ostensum Constantino, qui prodigio monitus, christianam religionem est amplexus, catechumenus factus, & cum Maxentio prælium committens, ad Milvium pontem insignem de tyranno victoriam retulit, arcu triumphali etiam num testimonium perhibente: quique in celeberrimo urbis loco hoc cæleste signum sub manum statuæ suæ collocari iussit. Eusebii auctoritatem sequuntur Socrates lib. I. cap. I. & II. & Sozomenus lib. I. cap. III. & IV. hic enim censet, a Constantino labarum in Christi vexillum commutatum *eo consilio, ut continuo ejus aspectu cultuque Romani a patriis ritibus paulatim abducerentur, eumque solum existimarent, quem Imperator coleret, & quo DUCE atque adiutore contra hostes*

uteretur. Quod quidem ante apertissime scripserat Eusebius de vita Constantini lib. IV. cap. XXI. Narrat enim, a Constantino imperatum, ut armis militum, *salutaris tropæi signum* effingeretur, utque ante exercitum, non *aurea simulacra & signa*, sed solum *crucis tropæum* præferretur. Hanc visionem contigisse volunt, qui Lactantii librum de Mortibus persecutorum commentariis illustrarunt ad diem VI. *Kalendas Novemb.* A. D. 312.

II. In nummis præterea primus fuit Constantinus, qui salutare hoc signum, idest monogramma procudi jussit, cujus exemplum plerique alii ex Augustis secuti sunt. Et ad Constantinum quod attinet, hujus rei fidem ipsis oculis præbent numismatum editorum icones, quas in medium attulere Antonius Augustinus in Dialogis pag. 16. Jacobus Gretserus tom. III. de cruce lib. I. cap. III. & sequentibus, magnus Baronius in Annalibus ad A. D. 312. num. 26. & sequentibus, Jo: Tristanus in Commentario Historico Gallico edito de antiquis numismatis, tom. III. pag. 543. Carolus Cangius in familiis Byzantinis passim, Claudius Molinetus in notis ad epistolas Stephani Tornacenlis pag. 424. & in Dissertatione de visione Constantini edita in Ephemeridibus Litteratorum, Amstelodami an. 1682. pag. 137. ac novissime Anselmus Bandurius de nummis a Trajano Decio ad Palæologos tom. II.

III. Inter nummos autem Constantinianos, Christi nomen in summo labaro præferentes, principem locum tribuunt rei nummaria scriptores eleganti numismati, A. D. 1592. ex Museo Angeli Breventani Papiensis vulgato a Baronio ad A. D. 325. num. 206. eodemque anno rursus edito a Lælio Pasqualino in brevi eruditæque Dissertatione Italica, appendicis loco ad Antonii Augustini Dialogos addita. Quanquam vero in nummo a Baronio prolato, Constantini imago *diademate* vineta sit, & in alio Pasqualini, *lauru*, utrumque tamen recte ad fidem cusum arbitratur. Gretserus tom. III. lib. I. de cruce cap. V. pag. 1803. quia iidem Impe-

peratores in nummis, modo *laurea* corona, modo *diademate* tempora præcingebant. Adde, quod *Constantinus*, primus Imperatorum, *diadematibus* usum induxit, ut late ex ejus nummis & antiquorum auctoritate probat Spanhernius Dissert. XII. de præstantia & usu numismat. §. IV. num. 16. pag. 389. & in notis ad Cæsares Juliani pag. 158. & 399. Visitur ergo in memorato nummo ex una parte *Constantinus* cum inscriptione CONSTANTINVS MAX AVG, ex alia *serpens*, qui per ventrem transfigitur hasta labari, in cujus fastigio litteræ X & P solemni veterum more conjunctæ, Christi nomen designantes; & epigraphæ in area SPES PVBLIC, ad denotandum, inquit Jacobus Oisellius pag. 331. quod in contritione veteris serpentis per nomen Christi SPES PUBLICA consisteret. Hic recte Oisellius loquitur. Hujus autem rei analogiam, ut observat allato loco Baronius, Eusebius ipse declaravit, qui in vita Constantini lib. III. cap. III. refert, *Constantinum* in sublimi quadam tabula ante vestibulum palatii posita, cunctis spectandum proposuisse *salutare signum*, capiti suo superpositum, infra vero hostem illum & inimicum generis humani sub *draconis forma in præceps ruentem*. Subdit deinde, a *Constantino*, *draconem* telis per medium ventrem confixum, & in profundum maris gurgitem projectum, sub suis liberorumque suorum pedibus, cera igne resoluta *depingi*, proponique omnibus sancitum fuisse: *designans hoc modo, occultum humani generis hostem, quem SALUTARIS ILLIUS TROPÆI, quod capiti ipsius superpositum erat, VI AC POTENTIA, in exitii barathrum detrusum esse significabat.*


IV. Verum quidem est a Tyrannis etiam, puta a *Magnentio*, *Decentio*, & *Vetranione*, Christi monogramma labaris impositum, ut liquet ex nummis apud Cangium in familiis Byzantinis tab. XII. & XIII. pag. 35. & 36. & ex nummis aureis & argenteis Musei Theupoli pag. 343. 344. Tristanus tom. III. pag. 633. 634. duos *Vetranionis* nummos profert, quorum alter in averfa parte habet monogramma *Chri.*

Christi effectum in labaro cum epigraphe: HOC SIGNO VICTOR ERIS. alter exhibet duo labara pariter cum *monogrammate*. Docet ibi Trifitanus, hos nummos a *Vetranione* cufos, ubi primum a legionibus in Pannonia est acclamatus, auxilium per hoc signum a Deo sperans adversus Constantium. Cæterum licet *Vetranio* ambitione percitus, imperium arripuerit, a Socrate tamen lib. II. cap. XXVIII. & a Sozomeno lib. IV. cap. IV. ob moderatum animum post purpuram depositam laudatur. Quod si secus scribit Aurelius Victor, Eutropius tamen lib. X. cap. X. *Vetranionem*, virum probum, & morum veterum, ac jucundæ civilitatis appellat. Auctor Chronici Alexandrini ad A. D. 350. de *Vetranione*, postquam tyrannidem dimisit, hoc elogium exaravit: *Vetranio* vero uti christianus, ac in Ecclesiæ sacris Liturgiis assiduus, in egenos eleemosynas erogabat, & Ecclesiæ Præsules usque ad mortem coluit. Pietatem quoque *Vetranionis*, veterum testimoniorum fide effert Andreas Erasmus a Seidel in epistola de nummo *Vetranionis* aureo singulari, in cujus averfa parte est labarum, *salutari signo* notatum, quod manu tenet Imperator, cui victoria lauream imponit, cum hac epigraphe: SALVATOR REIPUBLICÆ. Iterum edita est hæc epistola in Bibliotheca nummaria Bandurii, curante Jo: Alberto Fabricio pag. 292.

V. At quid de *Magentio* dicendum, qui fiste christianum agens, & diabolice vivens, ut de eo testatur S. Athanasius in Apologia ad Constantium num. 6. pag. 299. Christi monogramma in nummis cum litteris A & Ω hinc & inde cudendum curavit, quod & *Decentius* ejus frater præstitit? Ex his nummorum iconibus colligit Baronius ad A. D. 350. num. 2. & 3. *Magentium* in Christi nomine, spem salutis simulatam collocasse, eaque de causa *Constantium*, & *Magentium*, Christi nomine labara insignivisse, ut fretus uterque crucis auxilio, victoriam quisque speraret. Hinc immani scelere crux contra crucem prælata. Victoria tamen cessit *Constantio*, etfi ea indignus videretur propter Arianorum

pa-

patrocinium. Deus namque exercituum de *Magnentio*, & *Decentio* impiis tyrannis supplicium sumpsit, qui ex pulcris, ut ait Baronius ibidem num. 4. *nominis Christi signis diram aucupari tyrannidem, iisdemque sacris titulis proditorie uti ad invadendum imperium, sanctisque Christi notis christianissimo Imperatori machinari necem audebant*. Apposite etiam Christophorus Browerus Annalium Trevirensium lib. IV. pag. 234. ex nummis *Magnentii*, & *Decentii*, qui identidem apud Trevirenses civitatem effodiuntur cum monogrammate, eosdem *tyrannos lenocinio christianæ religionis* se Gallis probare voluisse colligit. Ita quidem rerum omnium arbiter eorum proterviam confregit, qui malis artibus opem divinitus sperabant. Ad hos *Magnentii* nummos quod attinet, obiter notandum, sphalma esse in Cangii Dissertatione de inferioris ævi numismatibus §. XXIV. pag. 20. ubi ex Choulilio laudatur *Maxentii* nummus cum monogrammate. Etenim Choulilium deceptum in nummi illius epigraphe legenda, & *Maxentium*, pro *Magnentio*, eundem Choulilium oscitanter scripsisse, jam pridem animadvertit Gisbertus Cuperus in notis ad Lactantium pag. 239. Patet igitur ex fide nummorum ipsius *Constantini*, Christi monogramma ab eodem Augusto, omnium primo, in nummis, in labaro & scutis fuisse exaratum.

VI. Nunc locus esse videtur, ut de ipsius monogrammati figura, quæ a *Constantino* efformata est, nonnulla ex veteribus monumentis, prodamus, quoniam non una omnium de eadem figura sententia esse intelligitur. Jure igitur a nummis ordiendum. Nummus *Constantini* apud Baronium A.D. 312. num. 26. cum epigraphe in averfa GLORIA EXERCITVS exhibet in labaro salutare Christi symbolum, littera X non *recta*, sed *transversa*, ut scilicet in hunc modum conficiatur . Eadem prorsus figura visitur in alio *Constantini* nummo ad summum labari fastigium, cum inscriptione in arca. SPES PVBLICA. Ita pariter sculptum est in lapide, ipso *Constantino* adhuc florente, de quo mox dicturi sumus. His adde

adde singularem *Constantii* nummum cum lemmate *HOC SIGNO VICTOR ERIS*, in quo monogramma conflatum est, eandem referens similitudinem ac eam, quam modo indicavimus. Pari ratione incisum est in lamina ærea apud Tristandum tom. II. pag. 681. in quo monogramma, medium inter duas coronas laureatas, subjectis his verbis. *DN CONSTANTIO AVG SEMPER VICTORI*. Imitatum enim volunt *Constantium*, in monogrammate describendo, signum ipsum, quod *Constantino* M. patri suo ostensum fuerat. Coronæ demum, quibus triumphantes milites gestabant, non aliter incisum habent monogramma. Hujus coronæ eſtypon vulgavit Baronius ad A. D. 351. ex Museo Lælii Pasqualini, & ipse Pasqualinus eam recudit in Dissertatione de nummo Constantini singulari.

VII. Attamen ex ipsis nummis, dissimili pacto monogramma confectum putat Onuphrius Panvinus lib. II. Fastorum pag. 392. editionis Valgriffi, anni 1558. Scribit enim, ex nummis *Constantini* apparere, signum monogrammatis, vel per Φ , vel per Ψ esse deductum. Re vera apud Cangium in familiis Byzantinis pag. 17. & apud Bandurium pag. 213. tom. II. habetur *Constantini* nummus, in cujus postica victoria gradiens, dextra tropæum, læva palmam tenens; & a dextris in area hoc monogramma Ψ recta linea intersectum, cum litteris *VICTORIA CONSTANTINI AVG*. Quod si ad *Constantinum* referendæ sunt aversæ nummorum partes, quas in medium affert Gretserus lib. II. de cruce cap. XXXVII. pag. 465. ævo ipsius *Constantini*, variis modis monogramma effingebatur, ut ibidem videre licet, si tamen in singulis iis nummis monogramma Christi exprimitur. Præterea in ipsis marmoribus, quæ Constantini ætatem vix excedunt, linea recta interfecante litteram P cælatum est. Id autem ostendit Baronius A. D. 312. num. 30. ex epitaphio *Marciani pueri*, Arbetione & Lolliano Coss. nempe A. D. 355. vita functi. Porro figuram monogrammatis, impositam capitibus agnorum, littera P in medium tantum cæsa,

sa, se vidisse in sarcophagis christianorum, testatur Bosius de Cruce triumphanti lib. VI. cap. XII. pag. 697. ubi icones hujus figuræ monogrammaticis protulit; & eodem lib. cap. XIII. pag. 710. ut ob oculos poneret, a christianis sæculo quarto cædi consuevisse litteram P linea recta, vetustam inscriptionem christianam in medium affert, quam e cœmeteriis Paschalis Papa I. ad altare Confessionis S. Praxedis transtulit. Nos eam hic etiam producimus ad aliqua illustranda.

DVLGIS ET INNOCENS . HIC DORMIT SEVERIANVS ✠

IN SOMNO

PACIS QVI VIXIT ANNIS P. M. L. CVIVS SPIRITVS IN LVCE
DOMINI SVSCEPTVS EST DIE Ɔ VIII. X. KL. MAR. DD. NN

FLAVIO CAESARIO ET NONIO ATTICO VV. CC.

QVEM LOCVM

EMIT VIRICVND A VXOR PASCASIO EPC.



Da veniam, erudite lector, si paulisper extra semitam digredior. Nomina & prænomena horum consulum, qui A.D. 397. consulatum gessere, nimiam licentiam Thomæ Reinesii arguunt, qui epist. LXIX. ad Rupertum pag. 634. scribit, a Panvinio, *Casarium* inter *Flavios* relatum, adplaudente nemine. Vides hic *Casarium* rotundis litteris, *Flavii* prænominem insigniri. Panvinius quidem lapsus est in alterius consulis nomine divinando; nam in Fastis ad A. D. 397. ex vetusta inscriptione *Pontius Atticus*, hierophanta A.D. 376. idem ei est, ac *Nonius Atticus*, de quo noster lapis. Profecto *Attici* consulis nomen primum est *Nonius*, quo etiam effertur in lucerna ænea, Christi monogrammate, & litteris A & Ω ornata, apud Bellorium in Observationibus ad veterum lucernas sepulcrales Part. II. tab. 24. cum hac epigraphe. NONI ATTICI V. C. ET INLVSTRIS; ex quo sacro symbolo, *Nonium Atticum* Christo nomen dedisse, satis constat.

E

stat.

stat. Ut autem, unde divertit oratio, revertamur, Bosius eodem loco duos alios lapides profert, in quorum area scalptum est monogramma unica linea tantum ad radices P deducta, positis tamen hinc inde A & Ω. Fabrettus, Inscriptio- num cap. VIII. num. XXVIII. monet, raro admodum in nostris monumentis reperiri monogramma, recta cruce litteram P interfecante, nec nisi A & Ω comitantibus. Variatum ergo intelligimus ex hactenus recensitis, ipsa *Constantini* atate, in monogrammate effigendo.

VIII. Ego vero, a *Constantino* illud designatum censeo, non unica tantum linea per medium P ducta, sed litteris X & P inter se compactis, & littera X non recta, sed transversa. In hanc me opinionem trahunt Lactantii, & Eusebii testimonia. Lactantius enim cap. XLIV. de Mortibus persecutorum scribit: *Constantinum* post visionem, *fecisse ut iussus est*, & *transversa X littera summo capite circumflexo Christo in scutis notasse*. Monogrammata, quæ in scutis Constantinianis videmus, nonnisi hanc figuram & præferunt. Itaque par est, ut credamus, a Lactantio hanc monogrammatis formam describi. Eusebius autem lib. I. cap. XXXI. de vita Constantini, ita constitutum in labaro monogramma fuisse tradit, ut essent duæ litteræ, primis apicibus nomen Christi designantes, *littera P in medio sui per litteram X decussata*, non *transversa*, ut sentit Bandurius tom. I. pag. 250. *χιδζω* enim, Latine exponitur, *decussio*. Præterea S. Paulinus Natal. XI. vers. 619. monogrammatis figuram describens, mediam *Rho* inter *Chi* statuit, & sex elementaribus litteris monogramma constare, docet. Ita enim canit;

*Nam nota qua BIS QUINQUE notat, numerante Latino
Calculus, hæc Græcis CHI scribitur, & mediam RHO
Cujus apex & signa * tenet, quod rursus ad ipsam
Curvatam virgam facit O, velut Orbe peractio;
Nam rigor obliquis facit I, quod in Ellade JOTA est.
TAU idem Stylus ipse brevi retro a cacumine ductus*

Effi-

* l. sigma

*Efficat, atque ita SEX, quibus OMNI NOMINE NOMEN
 CELSIUS EXPRIMITUR, cocunt ELEMENTA SUB UNO
 Indice, & una tribus formatur littera virgis*

Si monogramma Christi sex elementares litteras compendio continebat, & *Rho* per varios ductus, litteras O. I. T. efficiebat, nonnisi hæc de figura monogrammatæ & hac specie efformata, intelligi possunt. Ne vero in hac figura expendenda, nimis morosi videamur, satis erit, ut quivis cordatus homo, sive hoc, sive illo pacto *Constantinus* crucem pinxerit, cum Gretsero lib. II. de Cruce cap. xxxvii. pag. 461. agnoscat, hoc symbolum, & Christi nomen, & crucem ejus significare, quod negare est ausus Joannes Brentius.

IX. Ipsa porro rectæ crucis figura conspicitur, veluti christianorum tropæum, in area nummi *Constantini junioris*, apud Cangium pag. 27. Est enim ibi *crux*, media inter duas figuras militares, tenentes hastam & militare signum. Notum & illud, Gentilium labara, crucis instar fuisse; quod quidem tam frequenter Apologistæ christianæ religionis ipsis Ethnicis ob oculos ponunt, nimirum Justinus Martyr in Apologia ad Antoninum, Minutius Felix in Octavio pag. 286. & Tertullianus in Apologetico cap. xvi. Labarorum figuræ affabre exculptæ in plerisque Romanorum monumentis ad nos pervenere: harum nonnullas singulares habes apud Bosium lib. v. cap. xii. de Cruce triumphanti pag. 558. & sequentibus.

X. Sed & ad eandem crucem in nummis, in labarorum fastigio expressam, redeamus. In nummo *Licini* apud Tristandum tom. III. pag. 484. *crux recta* supra labari cacumen figurata est, in cujus area legitur VOT. XX. more scilicet Romanorum; nam *Licinius*, licet christianis visus sit favere aliquando, in eos tamen ex Pagio in Critica ad A. D. 316. num. vi. anno Christi 319. sævire cœpit, & immanis persecutoris nomine audiit. Vota in hoc Licinii nummo nuncu-

pata, Decennalia signant, quæ ob invidiam in *Constantinum*, qui A. D. 316. Decennalia celebraverat, eodem anno Licinius anticipavit, ut late probat Norisius in Dissertatione de numismate Licinii cap. v. & post eum Antonius Pagius in Dissertatione Hypatica cap. vii. §. xiii. pag. 162. qui tamen in Critica ad A. D. 315. num. 1. hoc eodem anno 315. Decennalia imperii Cæsarei Licinii exhibita fuisse contendit. Putares quoque rectam Christi crucem denotari in labaro nummi *Crispi Cæsaris*, Constantini filii, quem nummum habet Tristanus tom. 111. pag. 566. sed ea nota Decennalia designari, ibidem Tristanus monet, cui consentit & Pagius in Dissertatione Hypatica pag. 168. Ad *Crispum* præterea nummus refertur, in cujus postica visitur imago *Salvatoris*, media inter duas figuras, quæ *Crispi*, & *Constantini junioris* putantur. *Salvatoris imago*, sinistra crucem rectam tenet, & dexteram protendit, benedicens instar: & insuper titulus. SALVS ET SPES X REIPUBLICAE, hoc est: *Salus & spes Christus Republica*: littera X. Christi nomen significante. De hujus nummi fide dubitavit primum Baronius, quare in priori Annalium editione ad A. D. 324. num. 13. ejus iconem prætermisit, quod non satis perspecta & comprobata videretur. At in posteriore editione, ad eundem annum num. 14. eum procudit, propterea quia peritissimi nummorum exploratores, quos inter Fulvius Ursinus, ab omni suspicionis labe nummum illum vindicarunt. Bandurius tom. 11. pag. 324. ex Cangio pro *Salvatoris* imagine, *Constantinum* supponit, sed credendum magis Baronio, & aliis inspectoribus eruditis putamus, qui in nummo *Salvatoris* effigiem se conspexisse testati sunt.

XI. Postremo pro hujus capitis coronide animadversione dignum ducimus, sacrosanctum Christi monogramma in sepulcralibus etiam christianorum monumentis, antonomastice SIGNUM DOMINI, & SIGNUM appellari; prout & ipsam crucem hoc nomine a Sanctis Patribus donari, & præsertim ab Ambrosio, & Gaudentio apud Gretserum lib. iv. cap. x. vide-

CHRISTI DOMINI 37
videmus. His adde Augustinum serm. cccii. in solem nitate S. Laurentii cap. iv. & v. & lib. li. contra epist. Parmeniani cap. xiii, num. 29. quibus Alcimū Avitū jungo, qui lib. v. ita canit.

Sic nos CHRISTE TUUM *salvet super omnia* SIGNUM
Frontibus impositum.

Ad lapides me verto. En igitur hoc ipsum vocabulum marmori incisum, a Boldetto vulgato pag. 345. ex cœmeterio S. Hippolyti.

PETRO ET MARCELLINO IN SIGNO DOMINI ✱

sc

VIVI SIVI FECERVIM

Item apud eundem Boldettum pag. 399. alia christiana inscriptio, in qua *signum* tantum vocatur.

S I G N V ✱

CELIS ET CEREALIS. PATRI

BENEM. QVI. VIXIT. ANNIS

LXXV. M.VIII. D. V.

sc

DORMIT IN PACEM.

Alius demum lapis ab eodem Boldetto repertus ad cœmeterium S. Agnetis A. D. 1710. & ab eo editus pag. 273. Christi monogramma, *signum* appellat. A nobis hic vulgandus est, ut novatoribus ora obstruantur.

✠ ASELLVS ET LEA PRISCO PATRI BENE ME
RENTI IN PACE

QVI BIXIT ANNIS LXIII. MENSIBVS III
DIES N. XII

IN SIGNO



V. KAL. OCT. D. BASSO • ET ABLAVIO
CONSS.

Profecto auro contra habendum est hocce præclarum monu-
mentum, A. D. 331. quo consules *Bassus*, & *Ablavius* fue-
re, atque adeo *Constantino* M. Augusto adhuc superstitite,
exaratum. In eo enim & *Christi monogramma* apparet, cu-
jusmodi in nummis ipsius Constantini visitur, idemquæ
signum dicitur, qua voce sapius ab Eusebio, & crucem Con-
stantino ostensam, & ipsum monogramma designari audivi-
mus. Quamobrem desinere tandem debuissent veritatis ho-
stes, præsertim Jacobus Tollius in notis ad cap. XLIV. La-
stantii de Mortibus persecutorum, & Jo. Albertus Fabricius
in Bibliotheca Græca tom. VI. pag. 8. & sequentibus tantæ
rei memoriam, tantis testatam monumentis, calumniis &
conviciis incelsere, sed salutaris cælestisque signi symbolum,
qua decet reverentia prosequi.



CAPUT . VI.

De monogrammate in collariis servorum . Basnagius inscite ea de re Fabrettum vellet . Servi gentiliū in fronte notati . Constantini lex , ne servis & noxiis in fronte stigmata inurerentur . Confessores Christi a tyrannis stigmatē notati . Milites stigmatē signati . Milites christiani signo crucis muniti ante prælium .

Nunc ad illa Basnagii argumenta convertendus est animus , quæ in eum finem profert , ut ostendat , paganos Christi monogrammate usos esse . Irridet scilicet pag. 618. Fabrettum , quod christianismi notam eliciat ex vetusto collari servi , ubi hoc monogramma ✱ cælatum est . Hujusmodi siquidem conjecturam , Basnagius ait , evanescere ex eo patet , quod certum sit , servos gestasse collaria cum monogrammate , quod aut eorum nomen exprimeret , aut munus , quo in Dominorum adibusungebantur . Quid somnias amabo ? Fabrettus Inscriptionum cap. vii. num. 365. lamellam æream , utrimque inscriptam memorat , quam Laurentius Pignorius in Commentario de Servis pag. 16. in lucem emisit , ubi in parte antica hæc verba leguntur .

TENE ME Q
VIA FVG. ET REB
OCA ME VICTOR
I * ACOLIT
O A DOMINI
CV CLEM
ENTIS



DE MONOGRAMMATE
In averſa vero parte

F V G I E V P
L O G I O E X
P R E V R B



In ora utriusque partis, ut vides, Christi monogramma exaratum est. Fabrettus autem eo loci nihil habet de nota christianitatis, bene quidem doctissimus Pignorius, qui pag. 15. aliud etiam collare refert, quod se Romæ apud Lælium Paſqualinum vidisse testatur, hac epigraphæ inſcriptum.

TENE ME QVIA FVGI ET REVO
CA ME DOMINO MEO BONIFATIO
LINARIO A ✱ Ω X.

Notat ibidem Pignorius, huiusmodi collaria, Constantini ætati accensenda esse, quod Constantinus lege lata, quæ exstat in Cod. Theodosiano de pœnis leg. 11. vetuit in facie noxiorum scribi, *quum dedeceret faciem maculari, quæ ad similitudinem pulcritudinis celestis efformata esset*. Pignorio adſtipulatur Jacobus Gothofredus in Commentariis ad eam legem, ubi & illud animadvertit, post hanc editam a Constantino sanctionem, stigmata damnationis non *fronti*, sed *manibus*, vel *suris* inuri cœpiſſe. Itaque jure meritoque Pignorius conjicit, huiusmodi collaria, christianorum propria fuiſſe e nota *monogrammat*is Christi Domini, & e
men-

mentione *Acolythi*, ac demum ex verbis: *Dominicu Clementis*, quæ de vetustissima sacra æde *S. Clementis* in Urbe interpretatur. Idem Pignorius eadem de signo monogrammatibus, collaribus servorum imprimi solito testatur epist. xxiiv. pag. 91. Ad hæc Jacobus Sponius, licet heterodoxus, in Miscellaneis eruditæ antiquitatis pag. 301. inter varias inscriptiones, collaribus servorum incisas, quas profert, a Pignorio quoque adductas recudit, quas omnes a Constantini sæculo non abesse affirmat, idque e notis christianismi, ex depravato idiomate, aliisque deprehendi. Viden', erudite Lector, non Fabretum, ut somniavit Basnagius, sed Pignorium firmissimis conjecturis hujusmodi collaria christianis tribuere? Viden' qua de causa Basnagius, ut subdolum, animum contegeret, ex collaris apud Pignorium lemmatibus, hæc tantum verba retulerit: *Tene me quia fugi, & reboca me Victori*, cæteris quæ sequuntur, prætermisiss, ne impudentis mendacii argueretur, si *Acolythi* nomen, quod ibidem legitur, recitaret?

II. Præterea & illud nosse debuisset, servos Gentilium fugitivos ante Constantinum in fronte signari consuevisse, idque discere potuisset ex erudito Commentario Pignorii de Servis pag. 13. & 14. ex Theophylo Raynaudo de Stigmatismo sacro & prophano, ex Josepho Laurentio Polymath. lib. 1. Dissert. viii. pag. 20. aliisque sexcentis. In Oriente consuetudo fuit, ut servi in fronte ferrent Dominorum nomina, quo nosci possent. Id non tantum ex Ezechiele apparet, sed & ex Aristophane, qui Babylonios servos cum fronte inscripta introduxit in scenam. Vide Hesychium in vocibus *Σαυίαν δῆμος*, & *Ἰσπίαν*.

III. At quod laudabili lege Imperator *Constantinus* sanciverat, ne frontes scilicet servorum noxiorumque, stigmate ferirentur, id infregit *Constantius* Augustus, qui immani feritate frontes ipsas Episcoporum stigmate inuri præcepit. Hanc enim impii *Constantii* sævitiam S. Hilarius libro contra eundem Constantium num. xi. pag. 1245. novæ

editionis, his verbis detestatur: *Non queror, inquit, quia causam ignoro, sed tamen querela famosa est, iussos a te Episcopos non esse, quos condemnare nullus audebat, etiam nunc in ECCLESIASTICIS FRONTIBUS SCRIPTOS METALLICÆ DAMNATIONIS TITULOS recenseri.*

IV. Persecutionum ævo, confessores Christi, antequam martyrium subituri essent, fugitivorum instar, stigmatibus signatos fuisse, palam est ex Tertulliano cap. 1. de Corona militis, & ex Pontio Diacono in Actis S. Cypriani cap. VII. Ipsa quoque verbera & vulnera, quæ pro Christi fide passus fuerat Paullus Apostolus, *stigmata Christi* is appellat in epist. ad Galatas cap. VI. 17. Plura vide de notarum inscriptione signatis apud Baronium in Adnotationibus Martyrologii Romani ad diem XXII. Decembris.

V. Quemadmodum vero Romani Imperatores, militum manus stigmatibus, quod Augustorum nomen præferret, notari voluerunt, uti testes sunt S. Jo. Chrysostomus homil. III. in II. epist. ad Corinthios, S. Augustinus lib. II. contra Parmenianum cap. XIII. & Vegetius de re militari lib. II. cap. V. quin & aliis Augustæ domus officiis stigmata imprimebantur, puta *fabricensibus*, & *aquariis*, ut in lege *stigmata* Cod. de Fabricensibus, & in lege *Decernimus* Cod. de Aquæduct. adnotatur, ita milites christiani prælium inituri, *crucis signum* frontibus imponebant. Prudentius lib. II. adversus Symmachum vers. 712.

*Hujus adoratis altaribus, & CRUCE FRONTI
INSCRIPTA, cecinere tubæ.*



CAPUT . VII


Basnagii calumnia de monogrammate in nummis ante Constantinum depulsa . Ejusdem lapsus de numeris mysticis . De nummo Ptolemæo Cyrenensi regi tributo varia sententia .

Qui servis christianorum fugitivis notas atque siglas Gentilium peculiare infelicitate, ut vidimus, Basnagius adscripsit, quid quæso est, quod in cæteris feliciorum esse speremus? At is, monogramma simillimum monogrammati Christi se detexisse gloriatur in nummo *Decii Augusti*, christianorum hostis infensissimi, qui nummus visitur apud Jo. Tristandum tom. II. pag. 595. ubi in aversa

nummi parte, inter has Græcas litteras ΒΑΧΑΤΟΥ continetur. At cæcus omnino fuit Basnagius, aut certe Tristandum non legit, aut vidit unquam. Tristandus præmissas nummi litteras explicat in hunc modum, videlicet, ut cusus sit: *Sub Prætoris Apphiano BACCHARATO, his Stephanophoro Magnesium*; cujus quidem *Apphiani* nummi alii sub *Decio* cusi, a Jo. Vaillantio in *Coloniis Græcis* pag. 169. proferuntur. Itaque eæ litteræ, quæ monogramma Basnagio visæ sunt, compendiarie & contractæ sunt, ad *Baccharati* Prætoris nomen significandum; quod jam pridem viderat Menckenius in *Dissertatione de monogrammate* cap. II. §. 4. ubi docet, ex hoc elici, olim in medio vocum X & P contrahi consuevisse. Quare mira est Basnagii oscitatio vel cæcitas, qui monogramma inter memoratas modo litteras Tristanei nummi, se reperisse arbitratus est.

II. At majoris hoc & incitiæ & cæcitatæ est, quod pag. 618. ex Martiano Capella affirmat, scilicet a Martiano duas litteras X N inter mysticas recenseri: *Quis non crederet*, Basnagius ait, *hanc christianismi notam esse Xp̄s̄oꝝ Nix̄a: Christus Victor*? Attamen, prosequitur, exploratum

habemus, hoc esse Solis nomen mysticum per certos numeros designatum. Habendas dixeris Basnagio gratias, quod hoc mysterium ipse primus detexerit, sed dum voluit ex suo cerebro hæc confingere, fumum vendidit. Res vulgo eruditorum trita est, morem fuisse ponendi numerum, quo Dei cuiuspiam nomen mysticum obtegeretur, litteras habens, nonnisi mystis cognitæ, quæ collectæ numerum certum conficerent. Falsum omnino est autem, a Capella Solis nomen mysticum per litteras X N designari; bene tamen per X & H quæ summam numerorum *octo & sexcentorum* efficiebant. Ita sane nomen Solis mysticum a Capella per X & H denotari docet Hugo Grotius in Commentariis ad Apocalypseos cap. XIII. 16. ut hominum Basnagii sectæ addictorum testimonia asseram. Ab eo enim edoceri poterat, ad quem numerum hæ litteræ pervenirent, non arbitrato suo, novoque commento litteram N pro H inducere, & utramque *Christo Victori* inepte adscribere.

III. His vanissimis divinationibus succedunt aliæ nihilo probabiliore. Scilicet ut venerandi Christi nominis contemptorem se magis prodat Basnagius, scribere non erubuit, signum illud, quod monogramma Christi majores nostri dixerunt, falsis Diis etiam tributum, quod patere ait ex æreo *Ptolemæi* Cyrenensis regis nummo, in cuius aversa parte visitur Aquila fulmini insistent, ac inter ejus pedes hoc signum  quo nos Christi monogramma significamus. En novum & inauditum hætenus monumentum, de quo tantopere latatur, ut *monogramma paganis commune* olim fuisse persuadeat: perinde ac si de hoc numismate catholici Scriptores, veluti pudore quodam suffusi, siluissent. At Jacobus Gretserus hujus nummi iconem ex Bibliotheca Ingolstadiensi lib. II. de Cruce cap. XXXVIII. protulit; ac subinde meminere de eodem Antonius Bosius Romæ subterraneæ lib. IV. cap. XXXI. Paulus Aringhius lib. IV. cap. XXIII. Georgius Longus de Anulis cap. VI. Laurentius Pignorius epist. XXIV. pag. 90. & Fortunius Licetus de Lucernis lib. VI. cap. XLVIII. Basna-

Basnagius vero, nihil ambigui in nummo arbitratus, sed Josephum Scaligerum cæce secutus, qui in Animadversionibus Eusebianis pag. 150. scripsit, nummum illum pertinere ad *Ptolemaum Apionem* Cyrenes regem, & notam in ambitu nummi positam, esse notam *XPHETHPIOR* oraculi Jovis Ammonis, protinus nummum eidem Ptolemæo adjudicavit, & signum illud, cui Aquila insistit, de Jovis Ammonis oraculo interpretatus est. At ignoravit Basnagius, aut ignorare voluit, non esse adhuc exploratum, cujus *Ptolemæi* nummus ille fuerit, variasque eruditorum opiniones in ea nota interpretanda circumferri. Quidam enim hujusmodi notam, epitheton *Ægypti regum* esse volunt; alii *Jovis Ammonis*: singula Basnagius a Menckenio in Dissert. de monogrammate cap. 1. §. 2. didicisset, a quo etiam percipere potuisset, vero propiorem esse eorum opinionem, qui putant in memorato nummo, monetarii, seu monetæ Præfecti nomen, quod erat fortasse *Chrysantus*, *Chrysodorus*, *Chrysippus*, cujusmodi sæpe occurrunt, indicari. Optabat quidem Menckenius judicium Jo. Vaillantii de hoc nummo audire, a quo jam tum Ptolemæorum Historia ad fidem numismatum accommodata expectabatur. Verum Vaillantius nullum quidem de hocce nummo verbum fecit, quod in Præfatione Operis ultro professus fuerit, Ptolemæorum Historiam ex nummis *aureis*, & *argenteis* tantummodo se scripsisse, quia in paucis *æreis* addita erant nomina quædam *Euergetis*, & *Philopatoris*, sed sine effigie Principis; *unum* enim *ubique Jovis insculptum caput*: ratus scilicet eruditus vir, superbos reges haud esse dignatos, ut in ære eorum capita effingerentur; quamobrem in aureis argenteisque ad Historiam Ptolemæorum elucubrandam totam spem collocavit, & æreos prætermisit. Quæreret aliquis fortasse, quibus monumentis affirmari possit, a Græcis per litteras contractas, nomina in nummis aliquando fuisse signata. Frequens & obvium id in Græcis nummis antiquissimis, quos videre licet in tabulis numismatum Græciæ universæ ab Huber-

berto Goltzio vulgatis, qui de his notis peculiarem indicem etiam eodem libro contexuit. Hujusmodi litteras inter se implexas, vel compendio efformatas præferunt etiam nummi familiarum Romanarum. Res est vulgatissima.

CAPUT. VIII

Basnagii error in Socratis & Sozomeni testimoniis afferendis. Ea testimonia expensa. De cruce decussata in symbolis Ægyptiorum. In his Basnagius falso monogramma agnovit. De Tau littera crucem significante. De nummo Domitiani Isaco. Alia Basnagii errata.

QUAMVIS hætenus Basnagii aberrationes pro virili castigaverimus, quæ fidem & admirationem superare videantur, haud equidem scimus tamen, an ulla gravior ea sit, quam nunc exposituri sumus. Ubi enim putavit, se monogramma Christi in nummis Ptolemæorum demonstrasse, sententiam suam his verbis conclusit: *Socrates demum & Sozomenus referunt, cum delubrum Serapidis eversum est, CHRISTI MONOGRAMMA inter rudera fuisse repertum; quo evidenter ostenditur, hoc signo usos esse gentiles longe antequam Constantinus illud in labaro collocasset. Ægyptii contendebant, hanc litteram significare vitam venturam. Quapropter nemo facile sibi persuadeat, quoties in veteribus sepulcris ac monumentis hæc littera invenitur, per eam christianismi notam in monumentis iisdem agnoscere; id enim non evenit, nisi post Gentilitatis interitum, ac post Constantini imperium.* Quantis hæc, quæ tam fidenter pronunciat Basnagius, patentibus infecta vitiis & erroribus sint, videamus.

II. Historiam de funditus everso A. D. 391. Theodosii Augusti jussu, Serapidis templo, totius Ægypti pulcherri-
mo, narrant, ut eruditi sciunt, Rufinus, Socrates, Sozomenus, & Suidas. Rufinus narrationem accuratorem infuit,

tuit, templum ipsum & simulacrum describens; quippe qui non semel utrumque vidisse potuit, quum Alexandria una cum Melania diu versatus esset. Itaque Rufinus lib. II. Histor. Eccl. cap. xxii. situm & demolitionem templi ob oculos ponit; capite vero xxix. refert, quæ post eversum templum acciderunt. Urgente siquidem Theophilo Alexandrino Episcopo, etiam *thoraces Serapis*, ait, *qui per singulas quasque domos in parietibus, in ingressibus, in postibus etiam ac fenestris erant, ita abscissi sunt omnes & abrafi, ut ne vestigium quidem usquam, vel nominis appellatio, aut ipsius, aut cujuslibet alterius dæmonis remaneret; sed pro his CRUCIS DOMINICÆ SIGNUM unusquisque in postibus, in ingressibus, in fenestris, in parietibus, columnisque depingeret. Quod quomodo factum esse hi, qui supersuerunt ex paganis viderent, in recordationem rei magnæ, ex traditione sibi antiquitas commendata, venisse perhibentur. SIGNUM HOC nostrum DOMINICÆ CRUCIS inter illas, quas dicunt *isparixas*, idest sacerdotes litteras habere *Ægyptii* dicuntur, velut unum ex cæteris litterarum, quæ apud illos sunt elementis: cujus litteræ, seu vocabuli hanc esse asserunt interpretationem: VITA VENTURA. Dicebant ergo hi, qui tum admiratione rerum gestarum convertebantur ad fidem, ita sibi ab antiquis traditum, quod hæc quæ nunc coluntur, tamdiu florent, quamdiu viderent signum istud venisse, in quo esset vita. Unde accidit, ut magis hi qui erant ex sacerdotibus vel ministris templorum, ad fidem converterentur, quam illi quos errorum præstigiæ, & deceptionum machinæ delectabant. Hæc Rufinus, cujus integrum testimonium, licet fortasse nimis lectoribus longum, libuit afferre, ut intelligamus in quibus convenient aut discrepent cæteri veteres Historiæ Ecclesiasticæ scriptores, qui ab eodem hujus rei seriem sunt mutuati, tum ut videamus, quam inepte pro sua sententia horum loca & testimonia Basnagius adduxerit. Quod vero ad Socratem attinet, is libro v. cap. xvii. paulo a Rufino abit; scribit enim, dum templum Serapidis ever-*

everteretur, inventas in eo litteras lapidibus incisas, quas *hieroglyphicas* appellant: quæ litteræ CRUCIS FORMAM referebant: Gentiles æque ac christianos suæ eas religioni adtribuisse. Christiani dicebant, signum esse salutaris passionis Christi, PROPRIAM RELIGIONIS SUÆ NOTAM, nimirum CRUCEM. Gentiles vero commune quiddam *Christo & Serapidi* esse affirmabant: *siquidem CRUCIS EFFIGIES aliud apud christianos, aliud apud Gentiles significat*. Sozomenus autem lib. VII. cap. XV. de litteris repertis in templo Serapidis hæc tradit: *Ceterum dum hoc templum everteretur, ajunt, litteras quasdam, quas hieroglyphicas appellant, SIGNO CRUCIS SIMILES, lapidibus incisas apparuisse: quas quum viri earum rerum periti interpretarentur, significare dixerunt VITAM VENTURAM. Atque ob hanc causam multos Paganorum ad christianam religionem conversos esse dicunt, quum aliæ quoque litteræ significarent, illud tunc destructum iri, quum hæc nota CRUCI SIMILIS apparuisset*. Eadem prorsus habet Suidas, voce *Stauri*: *Theodosio, inquit, imperante, quum fana Gentilium diruerentur, inventæ sunt in Serapidis templo litteræ habentes CRUCIS FORMAM, quam videntes Græci, qui Christo addicti jam erant, CRUCEM apud peritos hieroglyphicarum notarum ajebant significare VITAM VENTURAM*. Hucusque de hac historia memorati Scriptores. At ubinam tradunt, in demolitione templi *Christi monogramma* inventum esse? Rufinus testis hac in re omnium præstantissimus, memoriæ ac litteris prodidit, everso Serapidis templo, ad hujus numinis cultum penitus abolendum, in iis locis, in quibus ejusdem Serapidis imagines collocatæ erant, hortante ac jubente Theophilo Alexandrino Episcopo, *crucis Dominica signum* positum fuisse, quo viso, Sacerdotes Ægyptiorum, qui per hujusmodi signum, *vitam venturam* denotari putabant, ad fidem convertebantur; propterea quod in eorum traditionibus esset, cultum Deorum in Ægypto defuturum, quum hoc signum venisset, in quo esset vita. Ex quibus hæc sunt obser-

observanda, nimirum *signum Dominicæ crucis* in ades, & in postes a gentilibus ad fidem Christi tum accedentibus, jussu Alexandrini Episcopi inductum, dejectaque Serapidis simulacra. Videmus præterea signum illud, a Rufino, *nostrum Dominicæ crucis signum*, veluti peculiare ac proprium christianorum, non Ægyptiorum appellari. Quod autem ad Socratem, Sozomenumque spectat, diversa quidem ratione rem descripserunt; at ea de causâ male audiunt apud Henricum Valesium, qui in Adnotationibus ad Socratis librum v. cap. xvii. & ad Sozomeni lib. vii. cap. xv. eosdem carpit, neque Rufini (idemque de Suida dicendum) mentem esse affecutos, merito contendit; tametsi eorum uterque disertis verbis affirmet, litteras in ruinis templi repertas: *signo crucis similes fuisse*. Et Sozomenus scribit, ejusmodi litteras: *a christianis pro signo salutaris passionis Christi, propriæ religionis suæ nota*, scilicet cruce vivifica usurpatas: effigiemque crucis, aliud apud christianos, aliud apud gentiles significare. Quis ergo non videt, falsissimam esse Basnagii argumentationem ex iis Socratis, ac reliquorum testimoniis, qua perperam intellectis, qua temere explicatis, nempe ex his haberi, *Christi monogramma* in Serapidis templo inventum esse, eoque paganos ante Constantinum usos? An duæ lineæ decussatæ, & inter se implicitæ, decussatæ crucis figuram forte efformantes, quarum usus ad alias res significandas apud ethnicos fuit, *monogramma Christi*, ex Græcis litteris X & P compactum ostendunt? Quisquis habet oculos, videat, & judicet. Si vero, ut putat Basnagius, *monogramma Christi*, hac sola figura X. effingitur, cur monogrammati auctorem non facit Epicharmum, qui litteræ X apud Græcos inventor esse dicitur?

II. His everfis, illud pari ruina collabitur, quod asseverat Basnagius, nimirum in baculis *Isidis* & *Osiridis* monogramma exprimi. Nemo hætenus eruditissimorum virorum, qui Ægyptiaca symbola sunt interpretati, tam linceus fuit, ut monogramma in baculis *Isidis* & *Osiridis* detegeret, non

Goropius Becanus, non Laurentius Pignorius, non Jacobus Bosius, non Athanasius Kircherus, aliisque bene multi, qui mensam Iliacam, obeliscos, & simulacra Ægyptiorum numinum intentis oculis sunt contemplati. In his monumentis frequenter quidem occurrunt crucis variz figuræ, nimirum crux *ansata*, *immissa*, & *decussata*, ac littera T. Adeant qui hæc cupiunt tabulas mensæ Iliacæ, quam omnium antiquitatum reginam appellat Goropius Becanus Hieroglyphicorum lib. xvi. pag. 261. Inspiciant tabulam primam ejusdem mensæ apud Pignorium pag. 17. ibique legant, quæ de hac figura ad Socratis & Sozomenis loca illustranda idem vir clarissimus disputat. Excurrant præclarum opus Jacobi Bosii de Cruce triumphanti lib. v. cap. viii. pag. 502. ubi ex statua Dei Canopi, hieroglyphicis litteris insigni, de quo Rufinus lib. ii. cap. xxvi. sex figuras crucis invenient; alias hujus generis, crucibus Christi similes ex Bembina tabula Bosius profert pag. 482. 488. 489. 495. 502. & 528. & ex obelisco Constantii pag. 532. demum ex suo aliorumque Museis pag. 477. & 491. Quod si his minime contenti, alia expectunt, conferant Jo. Baptistam Casalium de veteribus Ægyptiorum ritibus cap. xiiii. pag. 46. & in libris de Sacris veterum christianorum ritibus. Evolvant Commentarios Paulli Alexandri Maffei in antiquas gemmas, tom. ii. tab. xii. xv. xvi. xcvi. & cruces *ansatas*, ac *decussatas* inter symbola Ægyptiorum spectabunt. Consulatur denique de *signo Tautico* uberrime disceptans Athanasius Kircherus de Obelisco Pamphilio lib. iv. pag. 364. & sequentibus, & in Oedipo Ægyptiaco tom. iii. Syntagmate v. cap. iv. pag. 277.

III. Sane antiqui Patres, crucem Christi per Græcorum litteram *Tau*, in qua tricennarius numerus continetur, designari scripserunt. Ita Tertullianus lib. iii. cap. xxii. adversus Marcionem, & in Carmine adversus eundem, Clemens Alexandrinus lib. vi. de militibus Abrahami, Ambrosius in Prologo libri de Fide ad Gratianum, in Lucam lib. vi. cap. vii. & Tractatu de Abrahamo lib. i. cap. iii. Pru-

Prudentius in Præfatione Psychonomachia: vers. 50. S. Paulinus epist. xxiv. ad Severum, S. Augustinus in Judic. quæst. xxxvii. & Sermone cviii. de tempore, Faustus Rhegiensis de Spiritu Sancto, & S. Gregorius Moralium. lib. xxx. cap. xvii. At quum S. Hieronymus Commentar. in cap. ix. Ezechielis habeat: *Antiquis Ebræorum litteris, quibus usque hodie utuntur Samaritani extrema TAU littera, crucis habet similitudinem, quæ in christianorum frontibus pingitur, & frequentis manus inscriptione signatur*, Josephus Scaliger non dubitavit, erroris Hieronymum insinulare, ac pervicaciter contendit, Samaritana elementa eadem antiquitus fuisse, quæ hodie in Bibliis Samaritanis comparent. Verum ejus petulantiam retudit vir clarus Hieronymus Aleander junior, tum in Expositione gemmæ Ecclesiam exhibentis pag. 110. tum in epistolis, nempe iv. v. vi. & vii. ad Jo. Morinum datis. Etenim ostendit, in Siclis Ebræorum, cujusmodi exstant apud Villalpandum tom. i. pag. 380. Sacri Apparatus templi Hierosolymitani, litteram *Tau* hac forma scalptam esse X, idque uberius demonstravit, tum ex Siclis, tum ex alphabetis Samaritanis egregius vir Bernardus Montefauconius in Palæographia Græca lib. ii. cap. i. & iii. ut jam frustra sit dubitare, num *Tau* Samaritanorum, crucis formam prætulerit.

Quum vero Romani Deorum Ægyptiorum cultum amplexi essent, figuras crucis in symbolis eorumdem numinum expresserunt. Id manifeste apparet inter cætera ex nummo Domitiani Isiaco, quem ex Museo Eliæ Brackenhofferi xv. viri Argentoratensis, Dissertatione edita A. D. 1675. Ulricus Obrechtus, Argentoratensis illustravit. In anteriori nummi facie legitur. CAES. DOMIT. AVG. GERM. P. M. TR. P. xv. In averfa autem: *Figura sedens, coronæ instar caput galero testâ, tunicam induta manicatam, cinguloque correptam, & ad ima vestigia defluentem; dexteram instar cordis protendens; læva qua crucem immissam lateri applicat, lunæ dimidiata; pede autem sinistro in puppim liburnæ innixa.*

Recte vero Obrectus animadvertit, ejusmodi effigie ac symbolis Isiacum sacrigerulum denotari, ac figuram crucis ad Ægyptiorum symbola esse referendam, quod quidem veterum testimoniis adductis planum facit. Cur autem Domitianus nummum cum his symbolis percussit, ex Svetonio in ejus vita cap. 1. & ex Tacito Histor. lib. III. cap. LXXIV. patet. Tradunt hi, bello Vitelliano Domitianum Isiaci celatum habitu, delituisse, & casus suos in marmore effinxisse. Horum auctoritate permotus Obrectus, putat, a Domitiano hunc nummum extremis imperii sui diebus percussum, quoniam *ultimis periculis* proximus, conservatæ isthoc beneficio salutis memoriam, in spem vitæ venturæ hoc emblemate, anno imperii xv. ætæ vulgaris 96. consecrare voluit.

IV. Ex his quæ hætenus commentati sumus, nonne portentis similia dices, lector benevole, quæ Basnagius de Christi monogrammate in symbolis Ægyptiorum atque Gentilium est ariolatus, conjecturasque suas mendacissimas prorsus, ac sine ullo judicio confictas esse? Miramur profecto, cur Basnagius non scripserit, crucis figuras, quas in Romanorum tropæis, vexillis, simulacris Fortunæ, & Deæ Astartis intuemur, Christi monogramma significare, licet per hujusmodi signa ac symbola aliud Romani intelligi velent. De his apud Romanos, & in Deorum simulacris crucis speciebus adi, si lubet, Jacobum Pamelium in Tertullian. ad cap. xvi. Apologetici pag. 115. Gretserum de Cruce lib. 1. cap. LII. Jacobum Bosium lib. v. de Cruce triumphanti cap. xii. pag. 564. Petrum Seguinum in selectis numismat. pag. 4. & Jo. Vaillantium in Histor. regum Syriæ pag. 272. & de Coloniis tom. II. pag. 343.



CAPUT. IX

Fabrettus in his quæ scripsit de monumentis gentis Victoris, & de B. Tertullini cœmeterio, a calumniis Basnagii vindicatus. De siglis D. M. & D. N. in antiquis lapidibus christianis, Basnagii argumentationes expensæ. De Leopardi epitaphio a Mabillonio, & Fabretto vulgato. Infelices Basnagii conjecturæ de Pastoris symbolo. Inscite iterum a Basnagio Fabrettus reprehensus.

Postquam inanes ac exiles Basnagii conatus de origine & usu monogrammatæ Christi Domini evertimus atque contudimus, nunc illam Dissertationis partem aggredimur, qua bellum sacris martyrum & christianorum monumentis sepulcralibus male feriat homo indixit. Etenim ob singulares notas, quæ in his interdum occurrunt, eadem monumenta ethnicis decretorio judicio adtribuit, atque adeo pessundare sacra almæ Urbis cœmeteria conatur. Quamobrem in clarissimum virum Raphaelem Fabrettum, de sacris profanisque antiquitatibus optime meritum, pag. 619. §. IV. aspere invehitur, propterea quod singulares notas D. M. S. & D. N. & D. M. S. V. in aliquibus christianis lapidibus, DEO MAGNO SACRUM, DEO NOSTRO, & DEO MAGNO SANCTO UNI sit interpretatus. Quo jure hujusmodi siglas explicuerit Fabrettus, nunc est exponendum. Narrat vir doctus, Inscriptionum cap. VIII. num. VIII. pag. 547. Beati Tertullini cœmeterium circiter A. D. 1687. patuisse sub ipsa via Latina ad secundum lapidem, ubi illud in veteribus codicibus, ut refert Aringhius lib. IV. cap. V. statuitur. Dum enim fossores ædiculam quandam sepulcralem diruerent, in qua hæc duæ inscriptiones repertæ sunt :

D. M.
 VAL. VICTORIAE
 MATRI BENEMER
 ENTI. VIXIT. AN. L.
 EROTICE. FILIA
 FECIT

D. M.
 TI. IVL. THELESPHO
 RVS. IVLIAE
 VICTORIAE
 CONIUGI
 E. M. F.

scalis adhibitis, ad subditum coemeterium descenderunt. Memoratas has duas inscriptiones se præmisisse, monet Fabrettus, ut conjecturam ex iisdem caperet, *Victoriam gentem*, quæ superne, & in gentilitate sua sepulcra obtinuit, eandem, post conversionem ad nostra sacra, aditum, clandestinum ad subterranea, nulla alia ex parte pervia, quæsiuisse, & coemeterium hoc *B. Tertullino*, a quo post ejus aliorumque martyrum ab eo invectorum, depositio, nem denominatum fuit, commodasse. Ingressus recens hunc titulum habebat. COEMETERIVM BEATI TERTVL-
 LINI M.

Inter cetera monumenta, quæ ibidem inventa sunt, sequens inscriptio detecta fuit.

<p>d</p> <p>AVRELIAE</p> <p>RIAE QVAE</p> <p>ANNVM ET MENSES</p> <p>OCTO</p>	<p>N</p> <p>BICTO</p> <p>BIXIT</p>
--	------------------------------------

Observatione digna est, sequitur Fabrettus, invocatio D. N. fronti epigrammatis praefixa, quae detorqueri non potest ad DEOS MANES, ut in alia LEOPARDI, sed DEO NOSTRO explicanda est, ut christiana pietas exposcit.

II. Quid ad hæc Basnagius? Audi, quam belle in Fabrettum stilum vertat pag. 627. §. XI. *Cæmeterium Tertullini*, inquit, *in quo Fabrettus tres feminas Victorias invenit, quas christianas facit, inter suspectiora haberi debet. Aringhius, qui de eodem cæmeterio disseruerat, cujus testimonio res fulcitur, nonnisi ex pseudoactis S. Stephani id affirmat. Unde nam elicitur, tres Victorias ad synaxes christianorum convenisse? Conjectura tantum. Si conjectura; ea ne satis ad detegendum christianisimum, hætenus toto orbi ignotum? qua vero conjectura? quæ nibili facienda est, & falsis innixa fundamentis. Cæterum, si hæc femina Christo addicatur, id etiam de Thelesphoro affirmari debet, qui CONJUGI BENEMERENTI monumentum posuit. At in eo lapide DIIS MANIBUS consecratio invenitur, quæ de gentilitate ejusdem monumenti dubitare non finit.*

III. Si quis Basnagii verba cum Fabretti sententia conferat, ultro fateatur necesse est, Basnagium, dum ista scripsit, neque sui compotem fuisse, neque quid scriberet, omnino meminisse. Quam multa, hic peccet, lector benevole, brevibus accipe. Primum arguit Fabrettum, quod *tres femi-*

minas *Victorias*, *christianas* faciat, quum de *Aurelia Victoria* id tantum affirmet, cæteras duas, quarum epigrammata, in ædícula sepulcrali, in cujus angulo per scalas aditus ad subditum cœmeterium patuit, inventa, edidit, minime christianas agnoscat; immo, hanc gentem *superne in gentilitate sua* sepulcralia monumenta in hac ædícula habuisse rotundis verbis fassus est. Arguit etiam Basnagius Fabrettum, quod situm cœmeterii B. Tertullini ex apocryphis Actis apud Aringhium sumpserit. Acta, quæ Basnagius irridet, habent, clericos Stephani Papæ capite cæsos in *via Latina juxta formam aquæductus*, & sepultos a *Tertullino*, licet adhuc pagano. Mox addunt, *Tertullinum* Christo nomen dedisse, & capite truncatum, in *arenaria, via Latina, secundo ab urbe milliario*, eodem Stephano Papa curante, sepultum fuisse. An perperam Fabrettus conjecit, situm hujus cœmeterii ex Actis confirmari, quum in his ad *secundum* ab Urbe lapidem, *via Latina*, & prope *formam aquæductus*, statuatur; ac cœmeterium reapse *via Latina*, ad *secundum lapidem*, aquæductus formæ proximum, detectum sit? Anne sola hæc Acta hujus cœmeterii, & B. Tertullini meminere? Martyrologia vetustissima, ut Romanum parvum, Ado, & Ufuardus ad diem vi. Augusti de B. Tertullini cultu agunt in *crypta arenaria, via Latina*, & de ejus depositione ibidem *secundo ab Urbe milliario*; cujusque *Tertullini* cœmeterium ab *Hadriano I.* renovatum fuisse, litteris prodidit in ejus vita liber Pontificalis? Res ipsa præterea loquitur, nam in ipsius cœmeterii aditu hæc epigraphæ detecta est. COEMETERIVM BEATI TERTVLLINI M.

IV. En igitur, quibus monumentis hoc cœmeterium adferitur. Levissimum & commentitium illud prorsus, nimirum Fabrettum conjecturis ductum tradere, *tres Victorias* ad synaxes convenisse. Id enim purum putum Basnagii commentum est. Nihil hujusmodi habet Fabrettus, nisi, quod ex situ ædiculæ, in qua litterati lapides *Valerie Victorie*, *Julie Victorie*, ubi & *Julii Thelesphori* ejus mariti nomen,

re-

repti sunt ; quæ quidem nomina minime apud Fabretum inter christiana, referuntur ; quum enim in ejusdem ædiculæ angulo, & non alias, per scalas ad subditum cœmeterium descensus pateret, conjecit, gentem *Victoriam* post conversionem ad nostra sacra, aditum ad subterranea quævisse, & hanc cryptam *Beato Tertullino* commodasse. Quid, rogo, hic habet Fabretus, de *Valeria*, & *Julia Victoria*, quod & eas christianas fuisse, & ad synaxes convenisse, colligi possit? Bene quidem *Aureliam Victoriam*, ut christianam agnoscit, propter siglas D. N. quæ ad *Deos Manes*, inquit, detorqueri non possunt. Formula enim dedicationis *Deo No-*
stro, & *Dei Nostri Christi* solemniter olim fuit apud veteres christianos, & in lapidibus christianis occurrit. Lapidem sepulcralem *S. Victorini* martyris sub Trajano passi, ut alia prætermittamus, hic dabimus, ex Baronio ad xv. Aprilis exceptum.

I V B E N T E D E O C H R I S T O N O S T R O
S A N C T O M A R T Y R I V I C T O R I N O
Q U O D V V L T D E V S D E
S V O F E C I T

Vides ergo, lector, jure ne an injuria Basnagius Fabretum in his quæ ad *gentis Victorie* monumenta, & ad B. Tertullini cœmeterium spectant, in crimen vocet.

V. At iterum Basnagius Fabretum in judicium discrimenque adducit, quod notas D. M. in nonnullis christianis lapidibus, non ad *Deos Manes*, sed ad *Deum Magnum* referat ; præsertim vero in sepulchrali lapide *Leopardi*, in quo perspicuæ christianitatis notæ comparent. Audi quid Basnagius scribat pag. 620. §. v. *Ideo*, inquit, *christianos putat hos lapides Fabretus ob famam cœmeteriorum Urbis, & corporum ibidem conditorum : cæterum monumenta gentilium ; quæ in iisdem inveniuntur, loci religioni obstore ; litteras D. M. ita peculiare fuisse gentilibus ad DEOS MANES significandos, ut nonnisi post annos mille ferme ac septingentos*

H

con-

conjectum fuerit, eas ad Deum Magnum referendas esse; negari non posse, has notas a paganis ante christianorum exordia, & inventas, & usurpatas esse; quare mirandum esse, a christianis adhibitae gentilium formulas, & idololatriæ monumenta adprobata. An christiani a paganis didicerant, sepulcra & cineres Deo consecrare? Id nequaquam credibile. Si hujusmodi inscriptiones expendantur, signa gentilitatis adeo clara in his deteguntur, ut nullum prorsus sit dubium, quin gentilibus sint adscribenda. Visitur, exempli gratia, in harum nonnullis Mercurius, dextera caduceum, sinistra marsupium tenens. Visitur etiam Pastor Mercurio dicatus; & testudo, quod lyrae inventor Mercurius fuerit. An dicemus notas D. M. quæ in hujusmodi monumento leguntur, Deum Magnum significare? Ad hæc statuit, fieri non posse, ut monumenta gentilium a christianis monumentis distinguantur, quum incertum sit, an is qui in sepulcro jacet DEO MAGNO, an DIIS MANIBUS sit consecratus. En criticum jecur. Verum nihil in hanc disputationis partem infelix Bagnagus attulit, præter alucinationem, calumniam, obrestationem ac malevolentiam.

VI. Nam quod attinet in primis ad *Leopardi* inscriptionem, in cœmeterio Beati Castuli inventam, eam a Fabretto acceptam Jo. Mabillonius A. D. 1687. Musei Italici tom. I. pag. 73. vulgavit, ubi vir clarus observat, siglas D. MA. *solemnem paganorum dicationem Diis Manibus exhibere, idque esse referendum ad prima illa tempora, quibus cruda adhuc in quorundam cordibus christiana religio aliquid de paganici ritus superstitione retinebat.* Ejusmodi interpretationem ægre tulit Fabrettus, qui Inscriptionum cap. VIII. pag. 564. monuit, haud rite Mabillonium conjicere, ad gentilium superstitionem siglas D. MA. in titulis christianorum lapidum esse revocandas, quum istæ eadem siglæ *Deo Magno* accommodari possint, ac in lapide *Leopardi*, ipsas eo facilius *Deo Magno* interpretari debeamus, quo semel tantum in tota sui Operis collectione cap. III. n. 405. Deos

Deos Manes sub hac nota D. MA. vidisse meminerit, sed vel D. MAN. vel MANIB. , ac demum ab hac ritus paganici suspicione avertere Christi monogramma , quod sæpe in his monumentis jungitur. Ad hæc Fabrettus notat , in nonnullis inscriptionibus legi siglas D. S. V. quas interpretari debemus DEO SANCTO UNI. Fabretti monita quum perpenderit Mabillonius , in secunda editione epistolæ de Cultu Sanctorum ignotorum §. V. pag. 23. Fabretti sententiam de siglis D. MA. in lapide Leopardi maluit admittere , quanquam rariuscule id esse fateretur. Demum Fabrettus monuit, quod si forte contingat, ut *Manium* usurpatio in sepulcris christianorum occurrat, ut in Gruterianis lapidibus pag. MLVIII. I. & MLXI. 7. id factum est in monumentis *poetico stylo exaratis* ; depromptis etiam inconsiderate magis , quam impie , inextincta gentilitatis phrasibus . Ejusmodi est inscriptio in Museo Kircheriano , nuper ab Antonio Maria Lupo luce donata in Dissertatione ad Epitaphium S. Severæ martyris pag. 105. Inscriptio autem talis est.

DIS MANIBVS PRINCI
PIO FILIO DVLCISSIMO SVO PO
SVIT QVI VIXIT ANNIS VI. DIES
XXVII. IN PACAE

Hæc item invocatio, inconsulte magis, quam impie exarata est ; at si quando illa eadem in monumentis christianis occurrat , quod rarissime accidit , in ea , ipsis christianis incautis , ac ut ita dixerim , dormitantibus , irrepsit . Cujusmodi est illud in hac ipsa inscriptione , quod ejus auctori oscitanter excidit , nempe quod nomen patris , qui monumentum filio suo PRINCIPIO posuit , silentio prætermittitur .

VII. Denique irreligiosa & inepta omnino est Basnagii obtestatio pag. 626. adversus *Leopardi* epitaphium, quod nimirum barbaris vocabulis exaratum sit, atque adeo non ad prima christianorum tempora, sed ad extrema potius esse revocandum. Ad quæ tempora, amabo te? An ad nonum, decimumve Christi sæculum? Num quid innumeræ christiana inscriptiones barbarismis, vitiisque Latini sermonis, ac mendis scatent, plebejumque Romanorum idiotismum redolent, ab incorrupta Latina linguæ integritate, & ab ejus præceptis desistentem? Plurima sane de barbaris vocibus, iisque aut mutilis, aut male sonantibus, aut corrupta mendosaque orthographia refertis, ac a Latina syntaxi longe remotis, quæ in monumentis christianis ex sacræ urbis cœmeteriis erutis occurrunt, nuper congestit Antonius Maria Lupus ad Epitaphium S. Severæ martyris; quæ quidem monumenta tertio saltem Christi sæculo insculpta fuere, christiana religione adhuc inter persecutionum procellas gemente. An negotium Basnagio facescit formula cum *Spiritu Sancto*? De hujusmodi formula, quæ plebejus tertii sæculi idiotismus esse creditur eidem Lupo, de cujus varia inflexione imposita apud christianos est ipse adeundus pag. 165. Unum tantum hac in re lapidem afferam, quem A. D. 1719. in cœmeterio S. Urbani detectum, edidit Boldettus lib. 1. cap. XIX. pag. 87. Hoc enim modo Boldettus exhibuit.

EX VIRGINIO TVO BEN
E MECO VIXIT—MERTI C
ONIVCA INNOCENTISSI
MA CERVONIA . SILVANA
REFRIGERA CVM SPIRITA
SANCTA . DEP. KAL. APR. TIBERI
ANNO II. ET DIONI COSS

Hunc autem lapidem e cubiculis cœmeterii S. Urbani, ubi illum invenerat Boldettus, ante aliquot annos suis manibus edu-

eduxit, religione motus, ut hisce diebus ipse mihi narravit, Marchio Alexander Gregorius Capponius, sacri Palatii Apostolici Forerius major (quem honoris causa, & propter summam ejus erga me benevolentiam nomino), ac Romæ in avitis ædibus collocavit, ubi hætenus visitur, & hæc in eo tantummodo leguntur.

CONIVGA INNO centissi
MA CERVONIA SILVANA
REFRIGERA CVM SPIRITA
SANCTA . DEP. K. APR. TIBERI
ANNO II ET DIONI COSS.

Absunt a lapide, quæ primis duabus lineis apud Boldettum habentur, sed abrafarum litterarum, & fracti lapidis, a quo duæ illæ lineæ avulsæ sint, indicium apparet. At in eo (quod ad rem pertinet) perspicue est formula cum *spirita sancta*, barbæ inflexa, & adversantibus Grammaticorum legibus, una cum certa temporis doctrina, nempe *Tiberiano* 11. & *Dione* *coff.* qui A. D. 291. consules fuere.

VIII. Ad alia nunc Basnagii somnia transeamus, cujusmodi sunt illa, in nonnullis videlicet monumentis, *Pastoris imaginem* cum *lyra* & *testudine* conspici, superscripto titulo D. M. quæ nullo pacto ad *Deum Magnum* referri possunt. Qua mente hæc a Basnagio dicta sint, ignorare me, fateor: nisi forte respiciat ad lapidem, a Vignolio in Selectis Inscriptionibus pag. 307. vulgatum, ubi conspicitur in vertice *Mercurius* medius inter *testudinem* & *arietem* & in basi inscriptio sepulchralis cum consueta dedicatione *Diis Manibus*. Verum nunquam cogitavit Vignolius, hunc lapidem inter christiana monumenta referre, & evangelici Pastoris symbolum in eo agnoscere. Optime quidem statuit pag. 308. *Mercurii* effigiem esse, ob *arietis* & *testitudinis* figuras; rationemque reddit, cur *aries* Mercurio fuerit a veteribus adtributus, quæ apud Phornutum lib. 1. de Deorum cognominibus legitur, sed potiore putat Pausaniæ sententiam in Corinthiacis cap. 111.

cap. III. *quod unus præ cæteris Mercurius greges tueri, & augere existimatur*. Testudinem vero Mercurio adsignatam docet, ut lyra inventori. Qua de re Apollodorum lib. III. de Deorum origine ita loquentem adducit: *Inde in Cyllenem festinanter (Mercurius) proficiscitur pro antri ostio depascentem TESTUDINEM invenit, qua perpurcata, & absterisa super ejus testa, nervos ex matiatorum boum intestino confectos tetendit, & lyram confecit*. Ita & vere anaglyphum interpretatur Vignolius, in quo Basnagius, infelix commentorum artifex, *Pastoris boni effigiem* obtrudi putavit. Nihil enim absurdius dici potest, quam Pastoris evangelici imaginem, instar Mercurii, in monumentis christianorum veteribus confectam esse. Spectentur ea quidem, ac vetustissimi quique Patrum consulantur. In his passim obvia symbola Pastoris evangelici *ovem* super humerum gestantis, ac interdum hircum, ut ad illud Jo. x. & Luca xv. respiciatur, de peccatorum poenitentium lætitia; quin raro cum Pastoris imagine *galli*, & *columbae* copulantur. Ea de re vulgo eruditum jam protrita, ut veteres omittamus, vide Aringhium lib. IV. cap. xxxvii. Romæ subterraneæ, magni Baronii Annales Ecclesiasticos ad A. D. 216. & Theodoricum Ruinartium in Acta Sanctorum Perpetuæ & Felicitatis pag. 87.

IX. A Vignolio ad Fabretum, ab injuriis Basnagii vindicandum, iterum transeamus. Fabretti siquidem immanem errorem se detexisse gloriatur pag. 625. §. 1x. ac eo prolapsum putat, ut inter christianas inscriptiones lapidem retulerit, in quo apertis litteris *formulae DII MANIBUS* legitur. Hic me Basnagii miseret, qui oculis plane caruisse videatur. Fabrettus pag. 550. in notis ad inscriptionem Basilii num. xviii. positam, observat inter tot barbarissimos, quibus scætet, unam in ea incorruptæ Latinitatis formulam elucere, nimirum *annum* absolute, pro *anno uno*, enuncian- di, idque plurimis Gruteriani thesauri litteratis lapidibus confirmat, quibus alios addit, a se repertos, minime quidem christianos, a num. 14. ad 17. Idcirco autem num. 16. in-

inscriptionem affert PRIVATÆ MATRIS, in qua exstat *Deorum Manium* invocatio, ut ostendat per solam vocem *annus* absolute, *annum unum* intelligi. Nunquam vero in mentem venit Fabretto PRIVATÆ MATRIS monumentum, quod fucum fecit Basnagio, inter christianas inscriptiones collocare, sed ejus auctoritate est usus ad formulam Latinam pro re nata comprobendam. Vide, merito ne, an injuria erroris Fabretum Basnagius insinularit.

CAPUT. X

Basnagii lapsus in voce Depositus interpretanda. Quid apud veteres Depositus significaret. Quid item in monumentis christianis. Sirmondus a calumniis Basnagii defensus. Remus & Archontia christiani. Vignolius defensus.

QUI hactenus Basnagium in monumentis christianorum maledice contumelioseque convellendis immorantem audivimus, nunc quantum in iis interpretandis præstet videamus. *Depositionis* vox, quæ passim in monumentis christianis occurrit, christianam formulam, ac peculiarem christi-
 colarum esse docuerunt, plerique omnes qui de Ecclesiasticis antiquitatibus disseruerunt. Per eam enim significari ajunt, diem, qua christifideles in Domino obdormientes, terræ mandantur; in terram deponuntur, ac justis persolutis, sepulturæ mandantur. Hac de voce adi, si placet, obiter differentem Jacobum Gutherium de Jure Manium lib. 1. cap. xviii. & claræ memoriæ Justum Fontaninum in Commentario Italico de S. Columba cap. xix. pag. 68. 69. Solus Basnagius communi eruditorum sententiæ refragatur; nam pag. 624. §. viii. vocabulum *depositus* pro *mortuo* sumi ab Ovidio, Tristium lib. iii. Eleg. iii. contendit; quin a Sirmondo lapides proferri ait, in quibus *depositi* vox ethnicis adscribitur. Paucis rem perstringamus. Ovidius dum ægrotaret, & de matre sollicitus esset, ad uxorem scribens, con-

conqueritur, se ab ea esse disjunctum, doletque inter catera, quod lecto suo non languesceret: quod nullus erit, qui eum defleat, cum de sua vita desperatum erit, quod denique carebit honore sepulcri. Ita enim canit Elegia II. lib. II. vers. 39.

*Nec mea consuetudo languescent corpora lecto,
 DEPOSITUM nec me qui fleat, ullus erit?
 Nec Dominae lacrymis in nostra cadentibus ora
 Accedent animae tempora parva meae?
 Nec mandata dabo? nec cum clamore supremo
 Labentes oculos condet amica manus?
 Sed sine funeribus caput hoc, sine honore sepulcri
 Indeploratum barbara terra teget?*

Interpretes ad unum omnes, *depositum* hoc loco accipiunt pro *desperato*, id est cujus nulla salutis spes est; & Ovidium ipsum sui interpretem producunt; nam lib. II. de Ponto eleg. II. vers. 47. ubi Messalinum rogat, ut eum Augusto conciliet, hoc munus eidem Messalino se acceptum relaturum testatur, quantumvis prope desperatus, ac frigidus tum aeger esset. Ita enim habet:

*Mandatque mei legatus suscipe causam,
 Nulla meo quamvis nomine causa bona est.
 Jam prope DEPOSITUS, certe jam frigidus aeger,
 Servatus per te, si modo seruer, ero.*

Nunc intelligis, quo pacto Ovidius verbum *depositus*, non pro *mortuo*, sed pro *desperato* homine sumat; ac ita Ovidium explicandum esse docet quoque Jo: Hartungus locorum memorabilium ex optimis quibusque auctoribus excerptorum Decuria II. cap. VIII. §. XXIX. quod scilicet antiquis consuetudo esset, ut ii qui periculoso morbo laborarent, & de quibus desperatum esset, in januis aedium collocarentur, vel ut ibi supremum spiritum terrae redderent, vel ut a transeuntibus forte curarentur. Hi *desperati*, ut habet

Isido-

Isidorus lib. x. etymolog. dicti; qua de re Jo: Kirchmannus de Funeribus Romanorum lib. 1. cap. xii. Cicero Orat. 1. in Verrem, *agram & depositam* Remp. appellat, qui Orat. 1. in eundem Verrem, eam *desperatam*, & *agrotam* dixerat. Hinc natum, ut quoties res aliqua desperata esset, *depositi* voce veteres uterentur. Ex quibus sane falsi convincitur Basnagius, qui *depositum*, pro *mortuo* se in Ovidio offendisse existimavit. Res altiori investigatione non indiget, quippe quæ in Lexicis jam obvia. Vide, si lubet, Josephi Laurentii Polymathiam lib. 11. Dissert. xxi. pag. 128.

II. Ejusdem porro nausæ sunt, quæ de Jacobo Sirmondo Basnagius pag. 624. comminiscitur. Sirmondus in notis ad lib. vi. epist. vii. Ennodii Ticinensis, ut ostenderet variam in nomine *Boetii* A.D. 510. col. scribendo orthographiam, quum varient codices; alii enim cum aspiratione, alii sine scribunt; pro utraque scriptione lapides etiam profert; quorum alter exstabat in æde B. Agnetis, ubi.

VALENS. V. D. COMIT. DEPOSITVS
KAL. IVL. CONS. BOETHI. V. C.

Alter in D. Laurentii extra muros in tetrastylo, ubi.

GENEROSVS EVNVCHVS DEPOSITVS
IN PACE. VII. ID. OCTOB. BOETIO. V. C.
CONS.

Quibus argumentis, quibus indiciis Basnagius probat, hæc monumenta non esse hominum christianorum? Puris & putis somniis. Utramque inscriptionem a Sirmondo sumpsit Thomas Reinesius, catholicæ religioni minime addictus, & inter christianas collocavit Claf. xx. fol. 970. & 990. *Generosus* depositus *in pace* dicitur. Si formula IN PACE tam frequens in lapidibus sepulcralibus, e sacris cœmeteriis erutis, christianitatis notam non arguit, miramur, cur Basnagius eo

non deveniret, ut, neminem ab exordiis Ecclesiæ usque ad septimum æræ vulgaris sæculum Christo nomen dedisse, asseruerit.

III. Utique, si Basnagium sequimur, minime christiana est *Remi & Archontia* inscriptio, a Sirmondo itidem vulgata in notis ad Ennodii Carmin. lib. II. epigram. LXXIX. propterea quod hi versus in ea legantur:

*Hæc tenet urna duos, sexu sed dispares, fratres,
Quos uno Lachesis misit acerba die.*

Lachesis vox bilem movit Basnagio, & inde collegit, *Remum & Archontiam* fuisse gentiles, licet dicantur: DEPOSITI NONIS NOVEMB. CONS. DIOSC. V. C. nempe anno æræ christianæ 442. Locus ipse, ubi hoc litteratum epigramma inventum est, satis arguit, illud inter christiana monumenta esse referendum. Erutum est enim, narrante Bosio oculato teste lib. III. cap. LXI. pag. 436. e cœmeterio S. Agnetis via Nomentana A. D. 1603. Primus igitur edidit Sirmondus ad Ennodium an. 1611. deinde Bosius allato loco, & ex eo Aringhius lib. IV. cap. XXVII. pag. 176. Ab Aringhio epitaphium ipsum exscripsit Reinesius, atque christianis accensuit pag. 985. num. CCCLXXX. Displicuere ne Basnagio, aliisque in hocce epitaphio voces *Lachesis*, & *Tenaria aqua*? Sed sciant hi delicatuli, inquit Fabrettus pag. 112. christianos, poetico stilo, nonnulla a gentilibus desumpta, inconsiderate magis, quam impie imitatos esse. *Fata enim*, alio loco, nempe pag. 167. ait idem Fabrettus, & *fata iniqua* in epitaphiis ligata oratione leguntur, quæ *adultæ jam veræ religionis temporibus rescata sunt*.

IV. Posteaquam Basnagius signa & notas, quibus christianæ inscriptiones a profanis distinguuntur, profligare est conatus, tandem pag. 623. §. VII. iterum Jo: Vignolio succenset, quod Inscriptionum selectarum pagina 329. principem locum inter christianas tribuat lapidi eruto in cœmeterio Calepodii, in hæc verba.

D. M.

YPPOLITVS. Q. V. ANN.

XIII.

M. VIII

DP. V. KAL. SEP.

Animadvertit ibi Vignolius, siglas D. M. se cum Fabretto, DEO MAGNO, vel MAXIMO interpretari, & D P. *Depositus*; propterea quod una est ex notis, quæ christianorum epigrammata nobis patefaciunt, & a paganis secernunt. His addit etiam notationem *Kalendarum*. At clamorem hic excitat Basnagius, & utrumque ex his characterem falsum esse ait, quia *depositionis* vox in usu est apud profanos scriptores, ad *obitum* alicujus significandum, criminique vertit Vignolio, quod ethnicorum lapidem inter christiana monumenta retulerit, quia in eo *Kalendæ* adnotantur. Parumper hic siste, Lector. Audisti nuper, in qua significatione apud veteres Latinos *depositi*, & *depositionis* vox, & in qua apud christianos accepta fuerit, atque adeo intellexisti, quam infeliciter eam objecerit Basnagius. Hinc tu ipse colliges falso & injuste hac in re Vignolium redargui. Idem dices de notatione *Kalendarum*, ex qua elicuit Vignolius, monumenta christianorum ab ethnicis distingui. Vignolius enim Mabillonii sententiam secutus, qui in libello de Cultu Sanctorum ignotorum cap. VI. scripsit, sibi videri, notas quasdam esse, quæ christiana monumenta a paganis distinguunt, inter quas, notationes *Kalendarum*, *Nonarum*, & *Iduum*, quæ rarissime, inquit, si tamen unquam, in epitaphiis *genitilium* occurrunt, *Oppiæ* inscriptionem inter christianos lapides in sua selectarum Inscriptionum serie pag. 331. collocavit; sed id fecit, sola Mabillonii auctoritate permotus; nam animadvertit ibi Vignolius, nomina consulum *Cn. Lentuli*, & *M. Crassi*, quæ in eo lapide insculpta sunt, quum hi consules fuerint A. V. 740. ante christianam æram anno XV. contrarium ostendere. Persuasum igitur Vignolio

fuit, eam *Oppia* inscriptionem minime christianam esse, & Mabillonium aliquid humani passum, dum inter præcepta fecernendi epitaphia christiana a Paganis, *Kalendarum* notationem statuit. Quod enim ad hunc Mabillonii navum attingit, vir eruditus Antonius Maria Lupus in Dissertatione ad Epitaphium S. Severæ martyris §. xi. pag. 77. & sequentibus animadvertit, Mabillonii canonem, ita intelligendum esse, ut raro ethnici in Epitaphiis *Kalendarum*, *Nonarum* & *Iduum* mentionem injecerint; falsum vero esse, si *nunquam*, dixerimus. Etenim non infrequentes etiam gentilium inscriptiones in magno thesauro Gruteriano, quas indicat ipsemet Lupus pag. 78. & sequentibus, *Kalendarum* notationem præferunt. Cæterum quando cum *Kalendis*, *Nonis*, & *Idibus*, *depositionis* nota conjungitur, & Fabrettus, & Mabillonius, & Vignolius, alique rerum Ecclesiasticarum periti contendunt, nonnisi ad christiana monumenta hæc esse referenda.

CAPUT. XI.

Basnagii impietas in sacra cœmeteria refellitur. Nunquam in his gentiles sepulti. Criminatio de gentiliū sepultura in cœmeteriis christianis ob gentiliū epigrammata in eis quandoque reposita, eliminatur. An christiani funerum ritus, pompas funebres, libationes, & aquæ lustralis usum ab ethnicis sint mutuati.

REliquum modo est, ut immane erroris portentum eliminamus; ut enim Basnagius virus omne in sacra Urbis cœmeteria evomeret, affirmare non est veritus, ingentem gentiliū numerum in veterrimis, ac omnium religione consecratis sacris arenariis extra Urbem fuisse conditum. Horret animus, hæc audire. Ut igitur calumniam tam impudentem refellamus, ad Prudentium christianum Poetam veterrimum confugiamus oportet, qui sub quarti sæculi finem ipsa sacrosancta Urbis cœmeteria perlustravit. Is enim
testa-

testatur, Peristephan. hymn. xi. in principio, *innumeros sanctorum cineres* in cryptis martyrum se vidisse, & *incisostumulis titulos*, quorum singula nomina præ ingenti numero vix recenferi poterant. Hinc mirabundus, exclamat, vers. v.

*Tantos justorum populos furor impius hausit,
Quum coleret patrios Troja Roma Deos.*

Addit, *plurima sepulcra*, *martyris* nomen designare; & esse alia quæ solum *martyrum numerum* demonstrent. Quid quod? ipse Prudentius in hymno de S. Laurentio vers. 541. conqueritur, quod tam longe patrium solum ab urbe Roma distaret; vix fama se accepisse, quot sanctorum cineres in cœmeteriis Urbis sacræ reconderebantur? En aliquot ejus versus, eodem hymno de S. Laurentio, toties a nostris scriptoribus decantatos, ut ex his mendacii novatores convincantur, qui in sacra Urbis cœmeteria convicia jaciunt:

*Vix fama nota est abditis,
Quam plena sanctis Roma sit,
Quam dives urbanum solum,
Sacris sepulcris floreat.*

II. Quod autem insuper objicit Basnagius, gentiles bene multos in his conditoriis esse sepultos, idque evinci ex notis D. M. quæ gentilium, ut ille putat, singulares fuere, hoc non solum ridiculum & absurdum est, sed etiam nefarium & impium. In tantam porro calumniæ turpitudinem prolapsus non esset, si S. Cypriani epist. LXVIII. editionis Pamelianæ legisset, in qua Martialem Asturicensem Episcopum damnat, quod *collegia gentilium frequentaverit*, & *filios in eodem collegio exterarum gentium more apud profana sepulcra deposuerit*, & *alienigenis consepelierit*. Ad quem locum Annalium Ecclesiasticorum parens, perinde ac si divinaisset, Basnagium aliquando futurum, qui gentiles una cum christianis sepultos scriberet, hanc egregiam sententiam ad A. D. 258. pronunciavit: *Quibus plane significatur,*

tur, christianos a gentilibus sepulcra discreta habere solitos, nefasque fuisse, se illis post obitum commiscere, a quibus viuentes abhorruissent: quæ obsignasse voluimus ob aliquos leuiter nimis dicentes, in Urbis cœmeteriis una cum christianis gentiles quoque sepeliri consuevisse; nam immane scelus id, ut diximus censēbatur. Demum Basnagii commenta delet summa religio, qua prisci christiani sua cœmeteria habuere. Nos in re, quæ tota antiquitatis memoria confirmatur, immorari piget. Itaque lectorem ad Baronium A. D. 226. ad Paulum Aringhium lib. 1. cap. 1. & 11. Romæ subterraneæ, & ad Henricum Spondanum de Sacris cœmeteriis lib. 1. Part. 111. cap. XIII. mittimus.

III. Ut autem inconditæ Basnagii, aliorumque hæreticorum apud Fabricium Bibliographiæ antiquariæ pag. 664. cantilenæ occurramus, quam crebro nobis insusurrant, nimirum in cœmeteriis martyrum, gentilium monumenta reperiri, quasi in iis pagani una cum christianis sepelirentur, eos nos ad Aringhium lib. 111. cap. XXII. num. 2. ad Fabrettum Inscriptionum cap. 14. pag. 307. ad Mabillonium Musei Italici P. 1. pag. 134. & de cultu Sanctorum ignotorum cap. 19. amandamus. Hi viri præstantissimi fatentur quidem, gentilium epigrammata in sacris cœmeteriis detegi; sed experimento edocti, monent, id ea factum a christianis diligentia, ut inscripta gentilium nomina, aut obliterarentur, aut calce obducerentur. Ut plurimum vero lapidem invertebant, & in auersa parte, nullis characteribus signata, depositorum nomina exarabant. Præter lapidum exempla ab iis allata, alia a Boldetto lib. 11. cap. 19. & 20. collecta videre poteris.

IV. Mirari tandem non desinit Basnagius, cur sepulcrorum dedicationes a gentilibus christiani fuerint mutuati. At mirari desisset, si Baronium ad A. D. 44. adire voluisset, in eos, qui calumniam catholicis faciunt, quasi gentiliū supersticiosos ritus transfulerint, ita scribentem: *licuisse nimirum christianis, quæ gentiles superstitiose agerent, eadem*

dem sacris ritibus expiare, & ad pietatem transferre, majore diaboli contumelia, ut quibus ipse cultus erat, Christus ab omnibus honoraretur. In rem hanc ex omni sacra antiquitate exempla congerit Baronius. Fuscus etiam Aringhius lib. 1. cap. XXI. tradit, quos ritus a gentilibus in condendis defunctorum corporibus christiani acceperint, qui orthodoxæ religioni, illibatoque fidei candori non repugnarent. Itaque primi Christifideles, ut gentilium superstitionem in dicandis sepulcris DIIS MANIBUS eluderent, aut omnino ab dedicatione abstinerunt, seu titulum a Deo vero magno exordiri maluerunt. Id evincunt innumera christianorum monumenta, nulla dedicationis formula inscripta, & si quodpiam præfert siglas D. M. aut D. O. M. S. Deo Magno, & Deo Optimo Maximo Sacrum, fere semper dicatum significat. Quam quidem interpretandi rationem non modo catholici, sed etiam nonnulli ab orthodoxa fide alieni sequuntur, & inter hos Jo: Nicolaus de Siglis veterum cap. XXXII. §. VI. pag. 247. Hic enim apertissime docet, christianos in sepulcris dedicandis abstinuisse a formulis ethnicorum, & in loco harum christianas adhibuisse, exempli gratia, quum gentiles inscriberent I. O. M. S. christiani incidi curarunt has siglas D. O. M. S. Deo Optimo Maximo Sacrum. Mox addit, ex his constare, Christi cultores non usos fuisse D. M. Diis Manibus, sed statim more christiano rem ipsam aggressos fuisse. Ita plane loquuntur, qui ad veritatem animum traducunt.

V. At enim, Basnagius ait, pag. 627. §. XI. sepulcrales lapides visuntur, in quibus vas est ad libationes faciendas, atque marmori incisam formulam DIIS MANIBUS, quibus benedictiones dicata, paganismi signum esse. Præterea libationum usum ignotum fuisse christianis; nondum enim a paganis aquam lustralem acceperant; se enim paratum promptumque esse ad ostendendum, nunquam a priscis christianis in eorum exequiis aquam benedictam adhibitam. Multa hic Basnagius confarcinat mendacia, quæ procul dubio concident, simul ac
ri-

ritus veterum christianorum in funeribus indicabimus. Primis illis Ecclesiæ sæculis fideles christianorum corpora unguentis quidem delibuta condiebant, sed a coronarum, & florum ad sepulcra aspersione abstinebant, ne gentiles imitari viderentur, qui superstitioso cultu floribus ea ornabant, & Diis coronas certis ritibus consecrabant. Testis est hujus apud veteres christianos moris Minucius Felix in Octavio pag. 109. ubi Cæcilius hæc crimini christianis vertit: *Reservatis, inquit, unguenta funeribus, coronas etiam sepulcris denegatis*. Nec aliter ante Minucium Justinus martyr Apologia II. pag. 68. *Atqui id unicum habetis, inquit, quod nobis criminis loco objiciatis, non eosdem nos vobiscum colere Deos, neque mortuis libationes, & nidores adipum, neque signis atque statuis coronas & victimas offerre*. Thure & unguentis utebantur, de quibus Tertullianus in Apologetico cap. XLII. de Idololatria cap. XI. & libro de Resurrectione carnis. Concinit & Clemens Alexandrinus lib. II. Pædag. cap. VIII. Deinceps tamen christiani flores ad sepulcra adferunt in signum relatæ de Christi hostibus victoriæ, & profligatæ idololatriæ; adhibentes etiam libamina. Prudentius Cathemerinon hymno X. curam impensam in sepeliendis defunctis ob spem resurrectionis tradit, mox hymnum claudens, flores ad sepulcra sparsos memorat:

*Nos testæ fovebimus ossa
VIOLIS ET FRONDE frequenti,
Titulumque & frigida saxa
Liquido spargemus odore.*

De floribus item ad tumulos mortuorum S. Hieronymus in epistola ad Heliodorum cap. I. & ad Pammachium de obitu Paulinæ epist. LIV. novæ editionis Parisiensis, ubi Pammachium laudat, quod loco florum, eleemosynis Paulinæ animæ sit opitulatus: *Ceteri mariti, ait, super tumulos conjugum spargunt VIOLAS, ROSAS, LILIA, FLORESQUE PURPUREOS: & dolorem pectoris his officii consolantur, Pam-*
ma.

macbius noster sanctam favillam, ossaque veneranda, cleemofyna balsamis rigat. His pigmentis atque odoribus fovet cineres quiescentes. Idem ad Heliodorum de epitaphio Nepotiani epist. xxxv. alias III. cap. I. Quotiescunque nitor in verba prorumpere, & super tumulum ejus, epitaphii hujus flores spargere, toties implentur oculi, & totus in funere sum. Adi etiam de ritu condiendi aromatibus corpora defunctorum Edmundum Martenium de antiquis Ecclesiæ ritibus lib. III. cap. XII. Memorabilis est autem S. Augustini locus lib. VIII. cap. XXVI. & XXVII. de Civitate Dei, ubi ostendit, christianos non ad imitationem paganorum, tanquam Deos, colere mortuos in sepulcris; sed nos memorias martyrum, scribit, honorare, tanquam sanctorum hominum Dei, qui usque ad mortem corporum suorum pro veritate certarunt, ut innotesceret vera religio, falsis fideisque convitiis. Neque nos sacrificia his offerre, sed Deo, qui eos & homines & martyres fecit. Quæcunque vero obsequia martyrum locis præstantur, ornamenta esse memoriarum, non sacra vel sacrificia mortuorum, tanquam Deorum. Demum concludit: nos martyres nostros, nec divinis honoribus, nec humanis criminibus colere, sicut colunt gentiles Deos suos, nec sacrificia illis offerre, nec eorum probra in eorum sacra convertere. Faustus Manichæus christianorum agapes, & martyrum celebritates improbabat, quasi christiani: sacrificia paganorum vertissent in agapes: defunctorum umbras vino placarent & dapibus. Negat Augustinus lib. XX. cap. XX. & XXI. contra eundem Faustum, nos sacrificia paganorum in agapes vertere: Agapes enim nostræ, ait, pauperes pascunt, sive frugibus, sive carnibus. Satis præterea constat, funebres agapes ad alendos pauperes paratas fuisse, quod pluribus veterum Patrum testimoniis a Baronio ad A. D. 57. n. 132. docetur. Hæ ipsæ christianorum agapes, ubi detrimenti aliquid allaturæ visæ sunt, saluberrimis sanctionibus fuere coercitæ. Res notior est, quam ut probatione indigeat. Confer, si lubet, eundem Baronium ad A. D. 391. n. 39.

& ad A. D. 691. num. 27. Fuit igitur in Ecclesia catholica illud diligenter semper observatum, ut vel in honore afficiendis sanctis Christi martyribus, ritus profanasque gentilium superstitiones refugeret. Gentiles enim, mortuos tanquam Deos habebant, Ecclesia martyres honorat, tanquam homines Dei: gentiles sacrificia Manibus offerebant, Ecclesia Deo in honorem Sanctorum sacrificat: gentiles vita functis, veluti Diis, ludos & parentalia ad eorum sepulcra celebrabant: christiani vero si quæ obsequia ad sepulcra præstabant, ornamenta esse memoriarum, non sacrificia volebant; si qui vero ad sepulcra epulas detulere aliquando, minus recte id factum increpabant; quod quidem de sua ætate Augustinus testatur, lib. viii. de Civitate Dei cap. xxvii. his verbis: *Quicumque etiam epulas suas eo deferunt, quod quidem a christianis melioribus non fit; & in plerisque terrarum nulla talis est consuetudo; tamen quicumque id faciunt, quas cum apposuerint, orant, & auferunt, ut vescantur, vel ex eis etiam indigentibus largiantur, sanctificari sibi eas volunt per merita martyrum in nomine Domini martyrum.* Et vero abusus, qui irrepsert, maxime Augustinus ipse improbat epist. xxii. alias lxiv. eosque, nondum Episcopus, ab Ecclesia Hipponensi sustulit, ut liquet ex ejus epist. xxix. ad Alypium. Demum lib. vi. Confessionum cap. ii. summopere S. Ambrosium laudat, quod epulas ad martyrum sepulcra prohibuerit, quia illa quasi parentalia, superstitioni gentilium essent simillima, & lib. xx. contra Faustum cap. xx. *Qui autem, inquit, se in memoriis martyrum inebriant, quomodo a nobis probari possunt, cum eos etiam si in domibus suis id faciant, sana doctrina condemnet? Sed aliud est quod docemus, aliud quod sustinemus: aliud quod præcipere jubemur, aliud, quod emendare præcipimur, & donec emendemus, tolerare compellimur.*

Parentalia vero gentilium, quorum proprium hoc fuit, ut epulæ ad monumentum ferrentur, maxime improbantur a Tertulliano de Resurrect. carnis cap. i. & in lib. de testi-
mo-

monio animæ cap. iv. & item a S. Gaudenzio Brixienſi Epifcopo Tractatu de leſt. Exodi, ſeu Serm. iv. pag. 57. novæ edit. his verbis: *Parentalia inquam, unde idololatriæ malum extulit caput erroris: nam gula ſua cauſſa primum cæperunt homines prandia mortuis præparare, quæ ipſi comederent: poſt hæc etiam auſi ſunt ſacrificia eis ſacrilega celebrare, quamvis nec ipſi mortuis ſuis munus ſacrificent, qui exercent Parentalia, dum ſuper ſepulcrorum menſas, tremulis manibus vina fundentes, ſpiritum ſitire balbutiunt.* Ita hunc locum, & poſtrema verba reſtituit Paulus Galeardus Canonicus Brixienſis in notis, quorundam codicum ope & conjectura; nam aliter antea in vulgatis legebatur. Audin', quantopere dapes ad ſepulcra a gentilibus appoſitas primi illi Eccleſiæ patres horrerent? & hæc ab iis fuiſſe permiſſa chriſtianiſ, credendum eſt? neque eos moleſte tuliſſe, ut morem, quem tantopere exſecrabantur impune chriſtiani uſurparent? Abſit hoc & a priſca illa pietate, & a ſanctiſſimis illis majoribus noſtris.

VI. Poſtremum, quod nobis crimen objicit Baſnagius illud eſt, chriſtianos nempe, uſum aquæ benedictæ a gentilibus accepiſſe. Hæc vero mera calumnia eſt, ſolo fingentis arbitrio innixa. Jampridem magnus Baronius ad A. D. 57. num. 33. & ad A. D. 132. num. 2. adverſus oblatrantes novatores, garrientes, ſpeciem quandam incantationis per hanc aquam exarceri, teſtimonia Epiphaniï, Hieronymi, Theodoreti, Palladii & Bedæ de hujusmodi aquæ benedictæ inſtitutione protulit; deque ejus uſu ad præſtigias dæmonum averruncandas, id etiam, miraculis hujus aquæ virtute editis, teſtantibus. Quid quod? idem Baronius obſervat, aquæ baptiſmalis benedicendæ ritum ad ipſa Apoſtolorum tempora referri a Tertulliano de baptiſmo cap. vi. & vii. a S. Cypriano epiſt. lxx. & lxxxvi. editionis Pamellii, a S. Baſilio lib. de Spiritu Sancto cap. xxviii. ab Ambroſio de Sacramentis lib. ii. cap. v. ab Auguſtino lib. vi. in Julianum cap. viii. & ab aliis paſſim. Sed unum in medium

afferamus S. Cyrilli Hierosolymitani Catarchesi III. eundemque insignem locum, ex quo absurdissimus Basnagii error eluditur: *Ut illa, ait Cyrillus, quæ in aris offeruntur, quum natura sint pura, invocatione demonum, impura efficiuntur, sic contra aqua simplex, per Sancti Spiritus, Christi, & Patris invocationem accepta virtute, sanctitatem consequitur.* En qua virtute aqua sanctificetur: en quam falso a Basnagio arguatur, ab aqua lustrali gentilium aquæ benedictæ usum in Ecclesia Dei antiquitus receptum.

Postquam igitur tot ac tanta convicia Basnagius in Christi Domini sacrosanctum monogramma, in veterrima christianorum monumenta congescit, quæ satis superque, quoad per nos licuit, diluisse ac evertisse visi sumus, tempus jam nunc est, ut me colligam, oremque, Lector benevole, ut veniam des, si diutius in his te detinuerim, mecumque Deum Optimum Maximum deprecari, ut Ecclesiæ catholicæ hostes a calumniis mendaciisque in eam consarcinandis, ejusque vetustissimam disciplinam, ritusque sanctissimos impetere tandem aliquando desistant.

F I N I S.

I N D E X

R E R U M

A

A Gapes christianorum funebres . pag. 73.
Aleander Hieronymus junior .
17. 51.
Alexander martyr . 5. 7. 8.
Alexander Mammææ fil. Imp. 22. 23.
Almachius martyr . 7.
Ambrosius S. 36. 50. 74.
Anfidens. M. Antonius Card. 15.
Aqua lustralis . 75. 76.
Aringbius Paulus . 3. 4. 5. 7. 8. 9. 13. 15. 44. 53. 66. 70. 71.
Aristophanes . 41.
Artemius Dux Ægypti . 27.
Augustinus S. 37. 42. 51. 73. 74. 75.
Augustinus Antonius . 28.
Avitus Alcimus . 37.

B

Baccharatus, prætoris nomen. 43.
Baluzius Stephanus . 27.
Bandurius Anselmus . 32. 34. 36.
Baronius Cæsar Card. 8. 12. 28. 29. 30. 31. 32. 36. 42. 62. 70. 71. 73. 74. 75.
Basilus S. 75.
Basnagius Jacobus , ejus falsa sententia de monogrammate Christi Domini . 1. 2. 3. 7. item

emendatus. 39. ejus calumnia de monogrammate Christi in nummis gentiliū . 43. 44. ejus error de numeris mysticis. ibid. perperam Socratem & Sozomenum interpretatur . 46. & seq. falso putat in ruinis templi Serapidis monogramma Christi repertum . 49. item in baculis Isidis & Osiridis . 49. perperam Fabretum arguit . 53. & seq. ejus error in interpretandis siglis in monumentis christianis . 57. & seq. falso Jo. Vignolium carpit . 61. 62. falso item putat , in cæmeteriis christianorum , gentiles sepultos fuisse . 68. 69. 70. temere objicit funerum ritus a gentilibus apud christianos receptos . 72. 73. 74.

Becanus Goropius . 50.
Becillus Cæsar . 5.
Bellorius Jo. *Petrus* . 9. 33.
Boetius cos. 65.
Boldettus M. Antonius . 5. 7. 10. 15. 17. 18. 37. 60. 61. 70.
Bonarotius Philippus , laudatus . 3. 4. 6. 7. 15. 16. 25.
Bosius Antonius . 3. 4. 8. 9. 44. 66.
Bosius Jacobus . 3. 33. 35. 50. 52.
Bucherius Ægidius . 17.

C

- C** *Ajus Papa* . 5.
Cangius Carolus . 22. *emen-*
datus . 23. 31. *laudatus* . 28. 29.
 32. 35. 36.
Capella Martianus . 43.
Capponius Alexander Gregorius,
laudatus . 61.
Casalius Jo. Baptista, *notatus* . 9.
Causeus Michael Angelus . 9. 16.
Chalucius Ludovicus . 22.
Chrysostomus Jo. S. 42.
Clemens Alexandrinus . 4. 14.
 21. 50. 72.
Collaria servorum apud christia-
nos monogrammate insignita .
 40.
Constantinus M. Imp. *non est in-*
ventor monogrammati Christi
Domini . 26. *primus in nummis*
monogramma Christi procudit .
 28. *diadematis usum induxit* .
 29. *quo pacto monogramma ef-*
figendum iusserit . 31. 32. 34.
frontes servorum stigmatem non
inuri jubet . 40. 41.
Constantius Imp. *in ejus nummis*
monogramma Christi . 30. *fron-*
tes Episcoporum stigmatem inuri
jubet . 41. 42.
Crispus Caesar . 36.
Cuperus Gisbertus . 23. 31. *emen-*
datus . 24.
Cyprianus S. 69. 75.
Cyrellus S. 76.

D

- D** *Ecentius tyrannus, in ejus*
labaro monogramma Chri-
sti . 29. 30.
Depolitus, quid apud veteres &

quid in monumentis veterum
christianorum . 63. & seq.
Domini dicti Imperatores . 22. 23.
Domitiani nummus Iliacus . 51.
 52.

E

- E** *Nnodius Ticinensis* . 65. 66.
Eusebius Caesariensis E. 7.
 12. 24. 26. 27. 28. 29. 34. 38.
Ermes martyr . 5. 8.

F

- F** *Abrettus Raphael* . 2. 3. 5.
 13. 34. *defensus pag.* 30. &
seq. item pag. 53. & seq. *ejus*
sententia de siglis in monumen-
tis veterum christianorum de-
fensa . 58. 59. 60. *item defensus* .
 62. 63. 66. 68.
Fabricius Jo. Albertus . 13. 38.
 70.
Facciolatus Jacobus . 19.
Fauftus Rhegiensis E. 51.
Ferrarius Franciscus Bernardi-
nus . 21.
Fontaninus Justus A. Ancyra-
nus, laudatus . 15. 18. 63.

G

- G** *Aleardus Paulus* . 75.
Gassendus Petrus . 15.
Gaudentius S. Brixienfis E. 20.
 36. 75.
Genovefa S. virgo Parisiensis .
 13. 14.
Germanus S. Antistodorenfis E.
 13. 14.
Goltzius Hubertus . 45. 46.
Gorlaeus Abrahamus . 21. 22.

Gre-

Gregorius S. Rom. Pont. 51.
 Gretserus Jacobus. 3. 28. 32. 35.
 44. 52.
 Grotius Hugo. 44.
 Gutberius Jacobus. 63.

H

H Artungus Jo. 64.
 Heinſius Daniel. 21. 22.
 Heſychius. 41.
 Hieronymus S. 51. 72. 73.
 Hilarius S. 41. 42.

I

I N pace, formula chriſtiana.
 65.
 Iſidorus S. 65.
 Juſtinus martyr. 35. 72.

K

K Ircherus Athanaſius. 50.
 Kirchmannus Jo. 65.

L

L Atlantius. 26. 28. 34. 38.
 Lambecius Petrus. 17.
 Laurentius martyr. 5. 6. 8.
 Laurentius Joſephus. 41. 65.
 Leopardi epitaphium. 58. 59.
 Licetus Fortunius. 9. emendatus.
 ibid. 21. citatus. 44.
 Licinius. 35. 36.
 Lipſius Juſtus. 3.
 Longus Georgius. 44.
 Lucerna ſcſiles cum monogram-
 mate. 9. 10. 13.
 Lupus Antonius Maria, lauda-
 tus. 19. 59. 60. 68.

M

M Abillonius Jo. 2. ejus ſen-
 tentia de ſiglis D. MA. in
 monumentis veterum chriſtia-
 norum. 58. 59. ejus opinio de no-
 tatione Kalendarum &c. in la-
 pidibus. 67. 68. citatus. 70.
 Maſſejuſ Paullus Alexander. 50.
 Magnentius tyrannus in labaro
 monogramma Chriſti exprimit,
 & cur. 29. 30. 31.
 Marius martyr. 5. 8.
 Martenius Edmundus. 73.
 Maxentius tyrannus. 26. praelium
 cum Conſtantino committit ad
 Milvium pontem. 27.
 Menckenius Jo. Burchardus. 9.
 emendatus. 10. recte ſentiit de
 origine monogrammatum. 25. 26.
 citatus. 43. 45.
 Milites chriſtiani fronte ſiguo
 crucis ſignati. 42.
 Minutius Felix. 35. 72.
 Molinetus Claudius. 18. 28.
 Monogramma Chriſti, quid. 2.
 Uſu receptam ante Conſtanti-
 num. 3. 4. 5. Monogramma
 Chriſti in lucernis. 10. 12. in
 anulis chriſtianorum. 14. &
 ſeq. in ſigillis, amuletis, & teſ-
 ſeris. 18. ſalutare ſignum ap-
 pellatum. 24. Monogramma in
 nummis. 28. 29. 30. 31. qua ſi-
 gura a Conſtantino eſſormatum.
 31. 32. ſignum Domini appella-
 tum. 26. 37. 38. Monogramma
 in collaribus ſervorum. 39. &
 ſeq.
 Montefauconius Bernardus. 51.

N

Nicolaus Jo. 71.
Norisus Henricus, Card.
23.

O

OBrettus Ulricus. 51. 52.
Oisellus Jacobus reprehensus. 27.

P

PAgus Antonius. 35. 36.
Pamelius Jacobus. 52.
Panvinus Onufrius, ejus opinio
de figura monogrammatibus. 32.
emendatus. 33.
Parentalia christianorum. 74. 75.
Pasqualinus Lalius. 28. 32. 40.
Passerius Jo. Baptista, laudatus.
10.
Paulinus S. Nolanus E. 4. 25.
34. 51.
Paullus Apostolus. 42.
Peirescius Nicolaus Claudius
Fabricius. 15.
Pignorius Laurentius. 3. 21. 39.
40. 41. 44.
Plebejus veterum Romanorum
sermo. 60.
Pontius diaconus. 42.
Porphyrius P. Optatianus. 26. 27.
Primitius martyr. 5. 8.
Prudentius poeta christianus. 4.
42. 51. 68. 69. 72.
Ptolemaei Cyrenensis nummus. 44.
45.

R

RAmirez Laurentius emendatus. 10.
Raynaudus Theophilus. 41.
Reinesius Thomas, emendatus.
33. citatus. 65. 66.
Rufinus, presb. Aquilejensis. 47.
48.
Ruinartius Theodoricus. 62.

S

SCacchius Fortunatus. 8. 9.
Scaliger Josephus, notatus.
45. 51.
Seguinus Petrus. 52.
Serapidis templum eversum. 47.
48. littera hieroglyphica inter
ejus rudera reperta. ibid.
Servi stigmatibus notati. 40. 41.
Sigilla in cœmeteriis. 18.
Sigla in monumentis veterum
christianorum. 53. 57. 58. &
seq. 71. explicata. ibid.
Sirmondus Jacobus. 2. defensus.
65. 66.
Smetius Jo. 21. 22.
Socrates. 27. 30. 47. 48. 49. 50.
Sozomenus. 20. 27. 30. 47. 48. 49.
50.
Spada Philippus, Pisarenfis E.
laudatus. 10.
Spantemius Ezechiel. 23. 29.
Spes, & ispes in Deo, formula
christiana. 15. 16. 18.
Spirita sancta, formula apud ve-
teres christianos, barbata in-
flexa. 60. 61.
Spondanus Henricus. 70.
Sponius Jacobus. 18. 23.
Stigmata in frontibus noxiorum.
40. 41.

Sui-

Suidas . 48.
Symmachus . 2.

T

T *Ertullianus* . 4. 7. 14. 22. 35.
 50. 72. 74. 75.
Tertullinus martyr, ejus cœmeterium . 53. & seq.
Theupolum museum . 29.
Tollius Jacobus . 38.
Tornacensis Stephanus . 14.
Tristanus Jo. 28. 43.

V

V *Aillantius* Jo. 43. 45. 52.
Valentinus . 17.
Valesius Henricus . 49.

Valerius Severus . 16.
Vegetius . 42.
Vetranio tyrannus, in ejus labaris monogramma Christi . 29.
 30.
Victoria gens apud Romanos . 54.
 55. 56. 57.
Victorius Franciscus Eques . 13.
 15.
Vignolius Jo. defensu . 61. 62.
 66. 67. 68.
Villalpandus . 51.
Utere felix, formula . 18.
Vivas in Deo, formula christiana . 15. 16. 17. 18. item in Deo Domino Christo . 19. 20. addibita in conviviis christiano-
 rum . 20.

F I N I S

Pag. 29. lin. 24. Palæologos . lege Palæologos .
Pag. 29. lin. 4. Spanhermius . lege Spanhemius .
Pag. 39. lin. 1. collariis . lege collaribus .

0 1 1 1 1



